



西江志卷第六十三

名宦 七

廣信府

唐

楊光翼先任婺州長史肅宗置信州制以光翼為守治有惠  
愛歿而民懷之州人立祠祀焉 林志

裴倩字容卿絳州聞喜人歷信州刺史勸民墾田二萬畝以  
治行賜金紫服代第五琦為度支郎中卒諡曰節 唐書

孫成字思退博州武水人為信州刺史歲大旱發倉以賤直  
售民故饑而不害再期增戶五千優詔褒美徙蘇州 同上

常曾為信州錄事參軍韋應物作古鼎歌贈之云三年糾一  
郡獨飲寒泉井江南鑄器多鑄銀罷官無物惟古鼎 韋蘇



宋

滕宗諒字子京河南人由祠部員外郎知信州政尚平簡重

風化留意學校 林志

按宋史本傳宗諒為范仲淹同年進士仲淹稱其才以秦州軍事推官召試學士院改大理丞終左正言無知信州事

章得象字希言浦城人知玉山縣歷官鎮安軍節度使同平章事得象渾厚有容殊喜薦拔人物樂善不倦 宋史

按明一統志得象令玉山有惠政民立祠祀之

晁宗恪字世恭祥符人前知虔州州近粵多盜與訟宗恪至修弛廢抑姦強威信盛行盜不敢發而獄無繫囚熙寧元

年知信州一如虔州所至人皆安公之政而去常思之卒

於官 曾文定撰墓誌銘

王愈宣和間守信州方臘之亂鄰郡皆殘破愈遣宣教郎高至臨與通判王舜舉募兵士增陣浚隍修戰具賊至擊敗之追奔俘馘不可勝計東南既平詔加翰林學士 明一統志

李及之字公達濮人李迪弟之子由蔭登第知信州靈鷲山浮屠犯法者衆及之治其姦流數十人乃自劾朝廷嘉之 豫章書

蕭振字德起平陽人政和進士調信州儀曹時州郡奉神霄宮務侈靡振不費財勞民與守議不合會方臘寇東南距信尤近守欲危振檄攝貴溪弋陽二邑既而王師至衢又

檄振督軍餉振治辦無闕大將劉光世見而喜之欲以軍中俘馘授振為賞振辭曰豈可不冒矢石而貪人功乎諸邑盜未息守復檄振如初振悉意區處許其自新賊多降者守以賊去振獨為辦行守愧謝之調婺州兵曹歷敷文閣學士 宋史

葉顥字子昂興化軍仙遊人紹興進士知信州貴溪縣時詔行經界郡議以上中下三等定田稅顥請分為九等守從之令信州六邑以貴溪為式累官尚書左僕射 同上

陳扃建寧人紹興中以左朝散大夫判信州軍士謀欲為亂扃制禦有方尋除知信州事 明一統志

黃延年字曼卿知永豐縣紹興四年秋盜起延年授尉方略討平之民乃安居監司論薦焉 林志

沈介湖州人乾道四年守信州與趙師嚴為代師嚴在任時州兵嘗欲援往例有所求不獲遂謀亂雖散府庫以撫之猶反側未安介至誅首領二人餘皆安堵歲饑賑貸有方民得不死移知溧州老稚扶攜隨行數十里涕泣不忍舍 同上

徐礪字大崇乾道間永豐令邑有烏石灘勢險惡為民患礪鳩衆鑿之始平值大饑平穀價勸民出粟賑濟饑民有為盜者戮其首惡衆賴以安 明一統志

張子顏乾道中知信州知閭里隱伏臨事能斷盜賊屏息路不拾遺 同上

蔣億字仲永義興人淳熙間知鉛山以斯文為已任建學置田立儼舍給弟子員二十餘人令學焉億才高志遠蓋嘗

有意合兵萬里為國家立非常之功矣其辦一邑固當有餘力見朱子學記府志

方蘋字仲禮嘉祐間以大理丞知鉛山鉛俗尚鬼病者求巫禱祭不事醫藥蘋力禁之歲值旱虔禱鵝湖神雨立至狀

元劉輝記其事

同上

袁甫字廣微嘉定進士提點饒信刑獄移司鄱陽春夏雨久湖溢諸郡被水連請於朝給度牒二百道賑恤之盜起常山調他州兵千人屯廣信以為備行部問民疾苦薦循良劾姦貪決滯獄所至詣學宮講說勅書院貴溪之南祠先儒陸九淵歲大旱請於朝得度牒緡錢綾紙以助賑恤疫癘大作勅藥院療之所活不可數計官至兵部尚書卒謚

正肅

宋史

黃袞字季章永嘉人知玉山有惠政嘗以檄出人皆驚憂以為遂去及還老幼歡呼已而任滿請留不獲乃就邑之智門寺立祠繪像祀之

明一統志

石純臣紹興人不畏高明不侮細微人不敢干以私每閱訟牘輒以筆抹其誣罔處發奸摘伏如神明然

同上

李由字民載台州人知玉山以直道自任不受請託民有所訟決斷明果終日坐廳事重門洞開上下之情無不通者

同上

趙彥彬四明人嘉定間為貴溪令廉以律已嚴以御史寬以恤民其座右書曰俸薄儉常足官卑清自尊及代去百姓遮道攀轅請留涕泣送之

同上

按廣信府志稱前此宰貴溪者無廉吏諺語云飲却三

山堂下水縱非污者也成污彥彬曰自愛檻前山有意  
誰云堂下水污人其自表如此

趙與懃端平間以朝散大夫守信州斂強梗蠲虐征治河梁  
新驛舍剗除夙弊作興學校於是科舉得人甚盛同上

吳博古字敏叔知貴溪縣修學校延師儒作敬齋陸文安記  
之曰吏肅而事未始不治民蘇而公未始不足姦治直伸  
民莫不悅象山集

趙逢龍字應甫鄞人嘉定進士知信州至官有司例設供張  
悉命撤去日具蔬飯坐公署事至即面問決遣為政務寬  
恕撫諭惻怛一以天理民彛為言民是以不忍欺自常奉  
外一介不取民賦有逋負悉為代輸宋史

章鑄錢唐人淳祐間以朝議大夫知信州興學校建平政橋

諸廢無不補葺作上饒志而為之記明一統志

葉匪躬字正之令永豐多善政縣之東懽陂久廢匪躬悉心

興築灌溉之利至今賴之同上

曾從龍字君錫左僕射公亮孫初名一龍慶元進士第一賜  
今名知信州戍卒行掠境內從龍寘於法索得婦人衣命  
梟於市召權禮部侍郎宋史

柴景望理宗朝知弋陽縣強毅自立卓犖不羣編立義役優  
恤戶長裁決獄訟一出至公人情翕然稱賢令焉府志

按真西山奏議薦河東路知縣事有成績者十人景望  
與玉山令程榆與焉

程榆理宗朝知玉山縣天資靖重心術端良慈祥愷悌有循  
吏風值洪水驟至榆方在告力疾而出巡行撫勞不俟申

請捐公錢賑濟民賴全活 同上

丁黼理宗朝知信州真西山奏議薦黼性本誠實學有師傳素為物論推許今為郡守曾未數月循良豈弟之政已流聞於四方 同上

潘友文字文叔婺州人開禧間令永豐政尚寬惠推誠撫民時役法弊所在破家友文曲為均調使不困去官民為立祠陳同甫辛幼安皆稱其政學本之朱呂二先生云 豫章書

章謙亨吳興人紹定間知鉛山為政寬平人號生佛家置像而祀焉其興學養士禦盜安民禮賢表俗蠲賦救荒等績邑人勒之章岩以志不忘 府志

張忠孝淮安人生有膽略通兵法宋將亡文天祥徵義兵不

至忠孝發憤集義兵數百人聞謝枋得知信州遂往從之枋得授以帳前提點元兵寇饒由貴溪入信忠孝督兵安仁沿水列柵為固守計寇至逆戰死之貴溪令錢邦偉申請壘山祠配祀 同上

元

盧天祥至元中守信州興學校崇詩書暇日延儒生論治理復刻六經圖於石立兩廡下 明一統志

按林志作虞天祥許昌人

林興祖字宗起羅源人至治進士知鉛山素多造偽鈔者豪民吳友文為之魁遠至江淮燕薊莫不行使友文因偽造致富乃分遣惡少四五十人為吏於有司民罹其害莫敢訴興祖至即張榜禁偽造者且立賞募民首告俄有告者

至祥以不實斥去又有告獲偽造二人并贓者乃鞫之款  
成友文自至官爲之營救興祖命併執之須臾來訴友文  
者百餘人獄立具逮捕其黨二百餘人悉寘之法民害既  
去政聲籍甚江浙行省薦諸朝陞南陽知府遷道州路總  
管致仕 元史

辜中字德中至正進士知永豐不事刑罰惟尚德化民除輸  
租稅給徭役外足跡不至縣庭郡省薦章交上論其治行  
第一百里晏然民愛之爲立祠 明一統志

壽安至正中監玉山縣創立書院以絃誦爲教在任未久百  
廢俱興後以斂兵討賊死於難 同上

劉伯淵字巨川大都人大德中永豐尹抑豪強恤孤獨值連  
歲旱饑伯淵禱雨獨應兼勸賑有條一邑賴以全活其自

奉省約罕御梁內人號曰劉淡菜卒於官 府志

王禎字伯善東平人博通經史清介自持大德四年尹永豐  
以課農興學爲務常買桑苗及木棉子導民分藝遇旱或  
淫雨必齋戒虔禱著有農器圖譜農桑通訣刻於廬陵詩

集一卷名農務集 元詩小傳

宋詳字約夫至正間知永豐莅政數月興學校務農桑築陂  
塘以備旱潦陵陽寇至率兵禦之民賴以安 豫章書

張良材福建人爲貴溪尉有武勇至正壬辰之亂集義兵保  
障一邑時浙江左丞軍至信州良材以義兵接應一夕敵  
兵大至圍營數重良材以雙刀匹馬突圍出既復遇敵入  
深阻伏發馬躡遇害 林志

于大本字德中密州人由儒學教諭歷信州路總管賊犯信



州大本以土兵禦之被執至蘄水不屈死 元史魏中立傳

王伯顏字伯敬濱州人由湖廣省宣使歷烏程尹遷信州推

官至正九年遷知福寧州賊逼福寧為賊所執不屈死贈

嘉議大夫濟南路總管 元史本傳

按廣信府志稱伯顏在州數辨冤獄全活甚眾見福寧

節孝寺碑

明

徐中洪武間廣信知府持已廉潔措置有方嚴課生徒務臻

成效民常病涉修橋便之至今郡人論前守之賢者必首

稱中云 明一統志

按林志徐中浙江金華人

徐良弼字子中懷遠人洪武初知貴溪縣承平未久百姓離

散良弼日勤休息民漸復業時賦外多雜科民不堪命乃

具申民瘼不從輒至府涕泣言之遂得告免民賴以安 豫

章書

朱陵洪武初知玉山縣時兵革後四顧蕭然陵夙夜勞心於

養民之政於是逃散者爭先歸業百廢具興號稱治邑 明

一統志

趙景純閩縣人由儒士洪武間任上饒縣性廉介不避權要

修學校治橋梁理民事如家事卒於官邑人哀之 林志

張迪洪武間由御史左遷弋陽知縣廉明仁愛吏畏民懷後

因前任事被逮縣民千餘人赴闕奏宥還 豫章書

劉琢洪武初知弋陽創公署定賦役法務得均平民咸便之

府志

朱原貞永樂間任廣信同知政事文學衆所推許修學宮勸士崇儒民懷其德後卒官郡人無少長皆爲流涕明一統志

按豫章書原貞字季常婺源人

錢性字士復台州人永樂間知廣信府法制詳明禮教興舉

丙申值郡大水發公帑以賑全活甚衆林志

鄭庸福建人永樂初知鉛山縣廉介不阿措置有法宿奸巨

豪無不畏服民皆信之有所事以手札召無後期者明一

統志

徐仕宗山陰人永樂中知貴溪縣縣圯於水仕宗夙夜經畫修治一新累年逋負奏折絹布田地坍塌決奏免稅糧歲饑捐俸倡賑民戴其德任滿老穉爭赴上司乞留事聞加秩

通判留治縣事豫章書

孫珏侯官人宣德間知鉛山縣清勤慈惠民懷服之滿秩民

赴京乞留遂得再任前後幾二十年珏常手植松於庭皆

林立見者以比甘棠云府志

鄧顥字伯昂樂昌人正統進士知永豐縣鼎新文廟作興士

類勸農桑興水利以捕殺強寇遇害民咸哀之巡撫楊寧

韓雍具其事以聞勅贈光祿卿諡恭毅林志

姚堂字彥容慈谿人正統進士景泰間知廣信府尚簡易嘗

錄一郡先賢爲立祠肖像置祭田訪其後人以奉祀人多

賢之同上

陶鎔字汝器武功衛人天順進士知永豐縣政尚平易而務抑強梗民畏而懷之卒於官幾不能舉喪民爭泣賻焉同

王翰字廷舉蘄州人成化間知廣信府剛正恥阿附舉事惟義以故多觸忌僉事陳騏按部稽察苛細翰不爲動會大理卿夏時正巡視以陳言罷之百姓愛戴乞留至十三疏銓部以例不可爲之歎惜而已

豫章書

陳惠龍溪人成化間以御史出知廣信府外和內剛志切愛民嘗舉右族公正者士十六人優禮之與謀郡政未踰三年政平訟理不攜家止二僕自隨既疾卒民哀之如父母十六人爲治其喪以歸

同上

張曷字仲明慈谿人成化進士授鉛山縣性剛明不惑神怪有嫁女者及壻門而失女兩家互訟官不能決曷行邑界見大樹妨稼欲伐之從者言樹有神不可伐曷不聽有衣

冠三人拜道左曷叱之忽不見比運斤血注曷怒手斧之卒仆其樹巢中墮二婦人言狂風吹至樓上與三少年俱其一即前所嫁女也有巫能隱形淫人婦女曷執而印其背鞭之立死乃盡毀淫祠寡婦惟一子爲虎所噬少年欲難曷代婦書牒請拘虎抵罪曷與婦期五日乃齋戒祀城隍神約繫虎至及期二虎果伏庭下叱曰食吾民法當死無罪者免一虎起斂尾去一虎伏不動曷射殺之以畀寡婦一縣稱神君鉛山俗婦人夫死輒嫁有病未死先受聘供湯藥者曷欲變其俗令寡婦皆具牒受判署二木曰羞願嫁者跪之曰節願守者跪之民傳四妻祝不欲嫁舅姑給令跪羞木下曷判從之祝投池中死邑大旱曷意有冤獄齋宿神祠夢婦人泣拜覺而識其里居姓氏得詰其狀

及啓土面如生，哭之曰：殺婦者吾也。爲文以祭天，遂大雨。乃罪其舅姑，改葬焉。諸異政多類此。擢南京御史，累官至四川副使，引疾歸。明史列傳彙

陳裕字孟寬，莆田人。成化進士，知永豐縣，勤於撫字，寵辱無所介意。都御史高明有詩云：江西六十九花封，廉吏惟聞陳永豐。秩滿卒於家，其子不能舉喪。豫章書

汪澐字源潔，績溪人。成化進士，知玉山縣，寬簡宜民，清苦著節。每食齏粥而已。嘗公出，刻期未回，丞間饋以米，力却之。尋擢南臺御史。同上

陳勉，黃巖人。由舉人任府學訓導，學養深遠，諸生質疑難如臨龜筮，性純孝，生徒贄儀一毫勿取。擢桐城令，去諸生致贖者盡却之。府志

丁璣字至夫，丹徒人。成化進士，授中書舍人，以直諫謫普安州判。弘治間，遷廣信通判，其學嚴義利之辨，而緒餘見於詞章。其政以敦化善俗爲務，而簿書在所不屑。自奉甘澹，泊終始不渝，以憂去。豫章書

孫景靈字時望，上虞人。弘治進士，知玉山縣，以廉能稱。未幾卒於官，妻鍾氏哀毀自縊，有司奏旌其節，人謂景刑于之化云。同上

盧格字正夫，東陽人。弘治進士，知貴溪縣，風力敏，辦拓學基，建社倉，積穀數萬歲，侵不爲害。擢監察御史。府志

朱嘉會字亨之，寶應人。正德壬申，知廣信府，值姚源盜熾，朝命大將統邊兵及諸道士兵剿之，駐郡城，百姓騷然。嘉會撫綏，經略省科徵，簡徭役，懲惰吏，事理民安。先是附郭上

西江志 卷六十三  
饒歲役夫至六萬民不堪命嘉會循知縣張嶺舊規歲省  
役夫五萬有奇考績上京父老號泣送之 豫章書

曹琥字端卿巢縣人正德間以戶部主事直諫左遷嵩明州  
佐轉廣信府同知堅忍清苦宸濠取茶牙中官索方物皆  
力抗之民賴以甦陞鞏昌知府卒貧不能殮 同上

譚縉字廷儀長沙人正德間知永豐縣為政嚴明邑有點民  
常倚死人誣脅人為利有司不能鞠罹害者家輒破縉至  
按得其狀民皆神之修築平陽諸屯堡汰官軍糜費條上  
監司請奏革稅課又善治盜閭閻肅然 府志

杜民表字望之正德進士知鉛山心慈而守介宸濠之變決  
策守禦民賴以安歲饑設法賑撫有方又請給郡儲而濟  
青山窻饑民境內以安擢御史大禮議起忤旨廷杖鉛邑

人祠祀之 鉛山志

施仕湖州人任廣信千戶所吏目正德己卯宸濠之變賊黨  
數百人過信擄掠永豐欲從間道趨閩仕時為巡捕追至  
永豐雙山遇賊力戰被執不屈死之 府志

范永鑾字汝和桂陽人正德進士任貴溪縣時劉瑾用事歲  
派雜征宸濠暴橫歲取茶牙民苦之永鑾裁抑不畏強禦  
濬北鄉河以興水利賢聲茂著擢監察御史 貴溪志

季本會稽人嘉靖進士以御史建言謫揭陽主簿陞弋陽令  
視政明決修學宮置祭器政暇時進諸生講習士民至今  
思之 弋陽志

陳仕黃岡人嘉靖間由舉人知弋陽縣時閩浙倭警客兵騷  
動因肆為亂迫近鄰壤仕撫循既定議請建縣城賴以保

障焉同上

周日甲晉江人萬曆間由舉人令玉山明敏練達築萬柳洲改南城門修武安塔建儒學坊石龍橋惠政甚多

玉山志

伍表萃字道聚吳縣人萬曆進士授貴溪縣增置學田四百二十餘畝創文廟樂器祭器九百二十五件復象山壘山諸祠祀

貴溪志

盧謙字吉甫萬曆進士授永豐令時大仙馬駿等陂傾廢謙按故跡壘石為隄引溪水以備旱涸民食其利

永豐志

錢邦偉鎮江人由舉人萬曆間授貴溪令清介自持民苦南北兌糧申請委佐貳收解免民患而賦不擾至今賴之

貴溪志

劉一貫字省吾分水人由選貢授興安令葺學宮建社學及

城隍祠邑初設尚無志一貫纂成之尋內召去繼之者郎

文煥亦分水人請增入學額數興人德之

興安志

何京內江人由舉人天啓間授玉山令性廉峭剔蠹務盡時詔建魏璫生祠府檄派玉山百五十金京曰安有刻百姓脂以奉中貴者卻不應幾得禍太守蔣如奇力庇之以卓異徵

玉山志

徐之垣字心韋寧波人由進士授永豐令丁卯夏大旱秋檄入闡辭之甚苦有鹿鳴可聽鴻哀不可聞之語因秋糧少額上官有言民間之爭先輸納一日遂過其額明年入覲調繁吉水民不忍其去

永豐志

胡甲桂字秋卿崑山人崇禎十二年以副榜授南昌通判遷廣信同知至則南昌袁州吉安俱失廣信止疲卒千人士

民多竄徙會黃道周以募兵至相與議城守已而道周敗  
歿勢益孤甲桂效死不去

大兵至被執諭降不從幽別室自經死

明史王養正傳後

廖汝健贛州人由歲貢授廣信府學訓導黃道周督師委汝  
健署貴溪縣單騎就任

大兵至被執不屈死之

府志

國朝

張鳳儀字瑞梧錦州人順治初守信兵燹之後實心撫循具  
勒開闢假道廣信鳳儀籌畫供應民力不煩羣頌其賢

安志

郭永靜奉天人順治初由教習知上饒縣時賊兵四起值金  
王之叛永靜綢繆措置民始得安亂定後搜獲偽兵株連

頗衆永靜詳察情偽全活甚多陞紹興府同知

同上

扈標號岱瞻臨淄人順治丙戌進士知永豐縣值金王之叛  
標孤城堅守武弁李萬年與賊通標偵知之密揭撫提寘  
重典兵燹後戶口離散按籍覈詳達部除荒民始獲復業

府志

王應泰字旋鶴孝感人順治間以明經令鉛山勤敏和惠力  
除弊政鉛自設屯政有田入屯而糧仍民戶者應泰力辨  
之民得不擾重修北岸大義橋民蒙其利

安志

杜良祚沙河人順治丁亥進士知弋陽縣為政敏決土寇陳  
元貫嘯聚攻掠良祚親率民兵密授方略一戰殲之脅從  
者散去民賴以寧

弋陽志

曹淑貞字震一真定人順治間任永豐縣建縣治修學宮羨

西江志 卷六十三  
餘贖鍰悉為民解抵積逋嘗徵收練餉銀七百兩奉  
詔捐免立召里民具領悉原封還之後以疾告歸民立石紀  
其德 永豐志

黎士弘字媿曾長汀人順治甲午舉人康熙元年任廣信推  
官莅事精敏刑獄多所平反署玉山招徠撫綏逃亡復業  
兵民賴之又請清丈田畝除荒免稅建縣署修文廟所著  
有託素齋詩選文集仁恕堂筆記理信存藁 府志

高夢說號易菴費縣人由副榜康熙七年知廣信府儉約恬  
靜蠲虐政治河梁修學宮葺府志五年之內郡號大治 同  
上

譚瑄字左羽嘉興人康熙己酉舉人知弋陽縣時邑經閩變  
瑄多方撫集開墾荒田數百頃增市廛二百戶重新學宮

課士愛民治行稱最擢工科給事中 弋陽志

潘士瑞字子璧錦州人康熙十八年知鉛山縣時山賊盤踞  
勢熾甚士瑞具糗糧繕衣甲募死士授方略馘斬二百七  
十餘人生獲九人獲印劄旗纛無算連拔其寨鉛地悉平  
鉛山志

齊贊辰字振乾高陽人康熙十八年任永豐縣以滅賊為首  
務練鄉勇備禦斬劇賊江拐子等餘孽潰散地方以寧招  
集流遺開墾荒蕪民至今思之 永豐志

余毓浩諸暨人康熙二十年任玉山縣重建學宮修復懷玉  
書院捐建東津橋除免獵戶柴菜陋規又捐設水次漕倉  
百廢具舉 玉山志

饒州府



漢

唐蒙建元間番陽令開夜郎通西南夷

史記西南夷傳

按林志誤稱唐蒙建康間番陽令考紀元大全建康乃東漢順帝改元也今改正

吳

步騭字子山臨淮淮陰人孫權為討虜將軍召騭為主記與

瑯琊諸葛瑾彭城嚴峻俱遊吳中並著聲名權為徐州牧

以騭為治中從事建安十五年出領番陽太守

吳書

韓當字義公遼西令支人孫策東渡從討三郡遷先登校尉

授兵二千從征劉勲破黃祖還討番陽領樂安長山越畏

服同上

按雷次宗豫章記漢永元中置樂安縣即樂平縣也

虞翔章安人鄱陽太守工文章之事立言粲盛暄若春榮三

國志注

按明一統志林志俱誤作虞翻今改正

魏滕字周林祖父河內太守朗字少英列在八俊滕性剛直

行不苟合初迂策幾殆賴太妃救得免至是有罪權怒責

甚嚴敢有諫者死範突入叩頭流血言與涕並良久權意

釋乃免滕歷官鄱陽太守

三國志吳範傳

周魴字子魚吳郡陽羨人少好學舉孝廉為寧國長黃武中

鄱陽大帥彭綺作亂攻沒屬城乃以魴為鄱陽太守與胡

綜勦力致討遂生禽綺送詣武昌加昭義校尉後賜爵關

內侯賊帥董嗣負阻劫鈔豫章臨川並受其害魴遣間謀

授以方策誘狙殺嗣弟怖懼詣武昌降於陸遜由是數

郡無復憂惕在郡十三年卒賞善罰惡恩威並行

吳書

晉

虞溥字允源高平昌邑人也舉孝廉除郎中稍遷公車司馬令除鄱陽內史大修庠序廣招學徒移告屬縣乃具爲條制於是至者七百餘人溥乃作誥以獎訓之時祭酒求更起屋行禮溥曰君子行禮無常處也故孔子射於矍相之圃而行禮於大樹之下况今學庭庠序高堂顯敞乎溥爲政嚴而不猛風化大行有白鳥集於郡庭注春秋傳撰江表傳及文章詩賦數十篇卒於洛時年六十二

晉書

王廙字世將丞相導從弟辟太傅掾轉參軍元帝作鎮江左廙棄郡過江帝見之大悅以爲司馬頻守廬江鄱陽二郡及帝即位廙奏中興賦上疏曰臣以壬申歲見用爲鄱陽

內史七月四星聚於牽牛又臣郡有枯樟更生明天之曆

數在陛下矣以功累增封邑

同上

紀瞻字思遠丹陵稜陵人少以方直知名除鄱陽內史會蘇

峻亂瞻與溫嶠等率舟師赴難官至驃騎將軍

明一統志

按晉書本傳瞻以鎮東長史討周馥華軼功加揚威將

軍除會稽內史無鄱陽內史語今各志所載皆從一統

志因附紀之

顧衆字長始吳郡吳人徵拜駙馬都尉奉朝請轉尚書郎大將軍王敦請爲從事中郎補南康太守會詔除鄱陽太守衆徑之鄱陽不過敦敦甚怪焉及敦構逆令衆出軍衆遲回不發敦大怒召衆詰之聲色甚厲衆不爲動容敦意亦漸釋時敦又怒宣城內史陸喈衆又辯明之敦長史陸玩

在坐代衆危懼出謂衆曰君真所謂剛亦不吐柔亦不茹  
雖仲山甫何以加之後以討蘇峻功封鄱陽縣伯

同上

紀睦咸和間鄱陽太守有討賊功

同上

王大如字鉅夫陳陶人夷甫孫爲餘干令政得緩急之宜陶  
潛善之後爲劉裕所殺民懷其德立祠祀焉

明一統志

宋

虞丘進字豫之少以討苻堅功封關內侯從武帝征戰封五  
等侯盧循逼都孟昶等議奉車駕過江進面折以爲不可  
武帝嘉之除鄱陽太守

南史

王質字子貞性慷慨涉獵書史梁世以武帝甥封侯與侯景  
戰敗潛匿人間後奔荊州元帝承制歷位侍中吳州刺史  
領鄱陽內史

同上

梁

陸襄字師卿吳郡人大通七年出爲鄱陽內史先是郡民鮮  
于琛爲亂有衆萬餘人襄率民吏修城隍爲備禦及賊至  
連戰破之時豫章安成等守案治黨與因求賄貨不得其  
實惟襄郡部枉直無濫民作歌曰鮮于抄後善惡分民無  
枉死賴陸君又有彭李二家忿爭誣告襄和言解諭且爲  
設酒食令其盡歡酒罷同載而還民又歌曰陸君政無怨  
家鬪旣罷讐共車在政六年郡大治民四百二十人詣闕  
拜表陳襄德化求於郡立碑降敕許之又表乞留之襄固  
求還徵爲吏部郎遷秘書監

梁書

按林志陸襄傳太略安志誤入宋今從梁書改正

柳惲字文暢河東解人累遷太子洗馬父憂去官服闋試守

鄱陽聽吏屬盡三年喪禮署之文教百姓稱焉仕終吳興太守卒贈侍中子偃字彥游年十二引見詔問讀何書對曰尚書又曰有何美句曰德惟善政政在養民衆咸異之拜駙馬都尉都亭侯鄱陽內史同上

鄭弁字伯禮金華人大同間令鄱陽以愷悌為政民安之林志

隋

柳莊字思敬河東解人少有遠志雅達政事岳陽王蕭詧辟為叅軍轉法曹遷鴻臚卿高祖踐阼莊入朝高祖深慰勉之蕭琮嗣位遷太府卿及梁國廢授開府儀同三司并賜田宅徐璿等反於江南以行軍總管隨討璿平授饒州刺史甚有治名數載卒官隋書本傳

梁文謙安定烏氏人相州刺史彥光子弘雅有父風開皇十五年拜上州刺史煬帝即位轉饒州刺史歲餘為鄱陽太守稱為天下之最徵拜戶部侍郎隋書梁彥光傳按林志載文謙為鄱陽太守時歲饑民起為盜招徠賑恤又培土為市以居民使貿遷有無以遂其生

唐

薛振龍朔初饒州刺史在郡六年以神明馭下素山產芝民以為瑞立亭以表之因改其山曰芝山豫章書

竇儼總章間饒州刺史用鄧遠公銀山之議可以贍國用遂上其事置場以鄧公名之明一統志

郭元振名震以字行魏州貴鄉人十八舉進士為通泉尉累官同中書門下三品封代國公會玄宗講武驪山既三令

西江志 卷六十三  
帝親鼓之元振遽奏禮止帝怒流新州開元元年起為饒州司馬元振雖少雄邁及貴居處儉約手不置書人莫見其喜愠

唐書

顧錫貞觀間知餘干多惠政獲瑞鶴赤羽一白羽一

安志

裴士淹大曆間饒州刺史程烈女擊奸盜報父讐士淹刻石州門以表其節

林志

按豫章書程烈女父兄為盜所殺掠女去女尋以計脫歸告於刺史顏真卿捕獲戮於市女刳其心以祭父兄而不及士淹表門事唐書烈女傳亦失載

李復字初陽建中初為饒州刺史郡人陳饒奴年十二親亡歲饑或教其分弟妹可全性命饒奴流涕身丐全養復異之給資儲署其門曰孝友童子

唐書陳饒奴傳

按明一統志云復築堤捍江民德之號李公堤

李吉甫字弘憲趙人棲筠子貞元初為太常博士年尚少明練典故出為忠州刺史改郴州復改饒州會前刺史繼死咸言牙城有物怪不敢居吉甫命菑除其署以視事吏由是安誅擊奸盜治聲流聞憲宗立以考功郎中召為翰林學士累官中書侍郎同平章事卒贈司空謚忠懿

唐書

李德裕字文饒吉甫子也興元間管陶丞遷餘干令治政為

江東最

明一統志

按唐書李德裕傳以蔭補校書郎召拜監察御史穆宗即位擢翰林學士歷官始末不載管陶丞遷餘干令

馬植字存之由壽州團練副使三遷饒州刺史精吏事以文雅絢飾其政清淨不煩後進中書侍郎

唐書

韋嗣立字延構陽武人以成均祭酒貶饒州長史時表其廉卒贈兵部尚書同上

穆贊字相明河內人以御史中丞貶饒州別駕久之拜刺史贊質性彊直進觀察使卒於官贈工部尚書同上

歸宗敬字正禮吳人以國子司業貶饒州嘗陳民生疲敝當以德化天下卒贈兵部尚書林志

鄭珣瑜字元伯滎澤人貞元間饒州刺史性嚴重少言未嘗以私託人而人亦不敢謁以私清靜惠下賤斂貴發以便民累官吏部尚書卒諡文獻唐書

杜佑字君卿萬年人以父希望蔭補郟縣丞入為工部郎中累官戶部侍郎為盧杞所惡出為蘇州刺史改饒州後至

平章事贈太傅諡安簡佑天性精於吏職為治不皁察數

幹計賦相民利病而上下之議者稱其治行無缺同上

李瓚字宗器濮陽人以通政叅議出判饒州發奸如神權豪讐服制賦稅法斂者不敢肆安志

吳彥字俊之睦州人咸通間為餘干縣丞剗弊除奸有嘉禾白雀之祥林志

顏標乾符間饒州刺史黃巢攻城標力戰不支城陷死之同上

柳尹中和間尹樂平黃巢之亂死焉民為立廟安志

金安字曰安京兆人乾符間為浮梁令黃巢搆亂安籍民兵以障之民以獲全林志

按金安林志誤入楊吳今改入唐

楊吳

鍾泰章

吳錄作鍾章

合肥人為壽州團練使順義中人有告其侵

市官馬者徐知誥以王命遣王稔代之改泰章饒州刺史

或謂泰章何不自辨泰章曰吾在揚州十萬軍中號稱壯

士壽州去淮數里步騎不下五千苟有他志豈王稔單騎

所能代乎我義不負國雖黜為縣令亦行况刺史乎何為

自辨以彰朝廷之失

十國春秋

南唐

高拯字叔濟歙縣人保泰間知餘干喪亂後居民彫散科役

煩重拯為貸私錢若干萬緡每鄉責二人行商取息以資

公用民賴以蘇去後民為立碑

安志

宋

馬亮字叔明合肥人舉進士為大理評事出知饒州州豪白

氏多執吏短長嘗殺人以赦免愈驕橫為閭里患亮發其

奸誅之部中畏懾州有鑄錢監匠多而銅錫不給亮請分

其工之半別置監於池州歲增鑄緡錢十萬遷殿中侍御

史累官至太子少保致仕卒諡忠肅

宋史

吳在木青州人咸平時為餘干令嘗曰欲治其外先治其內

如曹司貪墨者榜出之又曰牧民猶牧羊也當除其敗羣

者一縣稱治有白雀青鹿之瑞民歌曰吳在木政嚴肅惡

者憂羈囚善者樂化育寇準薦其賢官至尚書

林志

張譚慶曆間知饒州兼提金銀銅坑冶公事時饒學燬譚新

之聘郡人胡寧為師

林志

朱琬慶曆間由秘書省校書郎出知鄱陽時知州張譚建學

琬助成之力居多

同上

范仲淹字希文蘇州人以吏部員外郎權知開封府時呂夷簡執政進用者多出其門仲淹上百官圖指其次第曰進退近臣凡超格者不宜全委宰相夷簡不悅因罷知饒州遷潤越二州其政尚忠厚所至有恩仕至叅知政事卒贈兵部尚書諡文正 宋史

毛抗嘉祐間樂平令有善政民立石記遺愛 同上

張讜西蜀人治平間德興令人頌之曰張侯張侯敷政優游民樂其業禾麥有秋 明一統志

劉季孫以左班殿直監饒州酒稅時王介甫為江東提刑見其詩風吹燕語落檐間底事來驚夢裏閒說與旁人渾不解杖藜攜酒看芝山大加稱賞差攝州學諸生始驚而終服之遂知名於時 西江詩話

蘇邁西蜀人文忠公軾子元豐間為德興丞文學優贍政事

精敏後人仰之立景蘇堂 豫章書

葉義問字審言嚴州人調饒州教授攝郡事歲旱發倉賑民

民德之 林志

吳與字可權漳州人元符間知餘干劉正夫論其愛民如子

弟護士如元氣決訟如神明大觀初除御史 餘干志

劉安節政和間知饒州民愛戴之後移宣州民遮留曰吾州

自范文正公後惟劉公一人而已 明一統志

蔣靜字叔明宜興人知安仁縣俗尚巫疫癘流行病者不服

藥靜悉論巫罪聚其所事淫像得三百軀悉投諸江徽宗

九年召為大司成出知洪州 豫章書

范鍔熙寧三年知樂平邑未有學鍔既視事喟然曰邑之缺



西江志 卷六十三  
典孰大於此遂度地爲之鍰治邑有異政秩滿士民獻其績於當路上之朝復留三年 樂平志

洪興祖字慶善丹陽人登政和上舍第爲湖州士曹改宣教郎提點江東刑獄知真州徙知饒州先是夢持六刀覺曰三刀爲益今倍之其饒乎已而果然秦檜當國諫官多檜門下爭彈劾以媚檜興祖坐嘗作故學士程瑀論語解序

編管昭州

宋史

郭僕字同升祥符人以父任通判全州權饒州浮梁宰未行時有賊張頂花者已逼縣境衆止之僕曰安逸則就艱危則辭非我所學徑就道至縣約束吏士誓以死戰賊聞之僞降入邑爲變邑官竄伏僕曰吾爲宰義不可去端坐公署遂遇害詔贈承義郎錄其後二人 同上

蔣興祖常州宜興人以廕累調饒州司錄睦州盜起旁郡皆震興祖白州將糾吏卒緝戰具盜不敢謀以功遷知開封府武陽縣靖康初金兵過縣力不敵死焉 明一統志

趙彥端紹興間知餘干縣剛介不屈爲政務豈弟民稱爲趙母尋爲江東運副制賑饑之法嚴不舉子之令 同上

按林志彥端字德莊宋宗室登紹興進士又按餘干縣志彥端自號介菴居士有文集若干卷謝諤爲之序

杜師旦紹興間知餘干初至奉行經界事召父老有才德者議田分六等租以五升爲率且囑父老曰勿回勢勿徇私一主乎公旣成民咸稱善以內艱歸 餘干志

沈度紹興間餘干令政有三善田無廢土市無閑居獄無宿

繫民謳歌之 林志

按縣志度字公雅

甯尹字正孚青陽人紹興二十八年知浮梁告長老曰令起農家耳備嘗疾苦奈何以鞭扑苦百姓其定約束與若守毋自刑也民相率趨令

安志

王十朋字龜齡樂清人隆興初除吏部侍郎力辭出知饒州饒並湖盜出沒其間聞十朋至一夕遁去丞相洪适請故學基益其圃十朋曰先聖所居十朋何敢予人移知夔州饒民走諸司乞留不得至斷其橋乃以車從間道去衆葺斷橋以王公名之累官以龍圖閣學士致仕卒諡忠文

宋史

唐文若字立夫睢山人登進士第遷起居郎出知邵州改近郡知饒州新學宮減田租奇耗二萬石又請歲糴常平義

倉之儲什三與民平市農末俱利而粟不腐遵以著令餘干有劇盜巡尉不能制文若遣牙兵捕而戮之加直敷文閣後知江州卒贈左通奉大夫

同上

詹體仁字元善浦城人隆興進士調浮梁尉郡上體仁獲盜功狀當賞體仁曰以是受賞非其願也謝不就體仁穎邁特立博極羣書嘗從朱子學以存誠慎獨為主真德秀嘗問居官莅民之法體仁曰盡心平心而已盡心則無愧平心則無偏世服其確論云

宋史

李舜臣字子思井研人紹興末著江東勝鑑十篇以上登乾道進士擢成都教授遷宣教郎知德興治尚風化民有母子兄弟相訟連年不決舜臣為陳孝友之道遂相愛如初聞詣學講說邑士稱蜀先生罷百姓預貸償前官積逋民

病差役舜臣勸諸鄉以稅數低昂定期久近創為義役期  
年而成民便之同上

劉燾字晦在建陽人受學於朱熹呂祖謙乾道進士調饒州  
錄事通判黃奕將以事汙燾而已自以賊抵罪去調連城  
令偽學禁興燾從熹武夷山講道讀書築雲莊山房為終  
老之計調贛州坑冶司主管文字仕至權工部尚書卒諡  
文簡同上

吳正國洛陽人淳熙四年知鄱陽縣為政有惠愛卒於官民  
立祠祀之豫章書

應孟明淳熙八年為樂平丞時新守趙廣徵索坊場積負孟  
明投書切諫指靈潦歸咎郡政守為之慙沮安志

徐木淳熙間樂平令漕使真德秀薦之云愷悌之聲為本路

### 縣宰之冠樂平志

婁機字彥發嘉興人乾道進士通判饒州平反冤獄蜀帥表  
說友辟參議幕中不就改幹辦諸司審計司轉對請裁損  
經費又論刑名疑慮之弊累官資政殿學士提舉洞霄宮  
歸宋史

楊簡字敬仲慈谿人乾道五年進士知樂平縣興學訓士諸  
生聞其言有泣下者少年為民害簡寘獄中諭以禍福咸  
感悟願自贖由是邑人以訟為恥夜無盜警路不拾遺民  
呼曰楊父累官以寶謨閣學士大中大夫致仕卒所著有  
甲藁乙藁冠記喪記婚記喪禮家記家祭記釋菜禮記石  
魚家記等書後人為作慈湖書院同上

趙與清臨安人開禧間浮梁令謂為政以人材為先乃增學

田易祭器創鄉賢祠講學行禮士風翕然丕變浮梁志  
史定之四明人嘉定間知饒州廣濟城隍著饒州志二卷林志

紀極嘉定六年知樂平時鄉飲久不舉極始行之江東諸郡  
大水邑當樂安江之衝極命囊薪護堤民以得免又置漏  
澤園以葬死而無歸者安志

洪咨夔字聖俞於潛人試饒州教授有文名仕終翰林學士  
制稱其鯁亮忠慤林志

程元鳳字申甫徽州人紹定進士輪對極論世運剝復之機  
及人主所當法者理宗覽之曰有古遺直風六年進秘書  
丞旬外知饒州郡初罹水災元鳳訪民疾苦夙夜究心修  
城堞置義阡寬誅求察証証進江淮等處提點坑冶仍兼

知饒州治司歲有冬夏帳銀悉舉以補郡積年諸稅斂之  
不足者芝生治所衆以治行所致元鳳曰五穀熟則民蒙  
惠此不足異也召奏事辭不就後累官右丞相封吉國公  
所著調齋文集若干卷宋史

吳泳字永叔蜀人寶祐間浮梁令愛民禮士加意常平以備  
歉林志

按宋史本傳泳字叔永潼川人嘉定二年進士歷官為  
軍器少監升秘書丞兼樞密院編修遷秘書少監權吏  
部侍郎後知温州改知泉州其知浮梁事失載

唐震字景賢會稽人通判臨安府江東大旱擢知信州震奏  
減運米蠲其租賦令坊置一吏籍其戶勸富人分粟使防  
吏給之吏有勞者輒為具奏復其身吏感其誠全活無筭

州有民庸童牧牛牛逸而牧舍火其父訟庸者殺其子投火中民不勝掠自誣服震視牘疑之密物色之得童傍郡以詰其父對如初震出其子示之獄遂直咸淳十年知饒州時興國南康江州諸郡皆已歸附大兵略饒饒兵止千八百人震發州民城守昧爽出治兵至夜中始寐上書求援不報明年二月兵大至震盡出府中金錢募有能出戰者賞之衆懼不能戰北兵登陴衆遂潰震入府中玉芝堂其僕前請曰事亟矣鄱江門兵未合亟出猶可免震曰民命皆係於我城中民死我何面目生耶有頃兵入執牘鋪案上使震署降震擲筆於地不屈遂死之兄椿與家人俱死贈華文閣待制諡忠介 宋史

王貴行蜀人咸淳間德興丞元兵至被執曰幼學壯行惟忠

與孝竟赴水死

豫章書

周偉德祐間爲浮梁丞元兵起偉曰以守無城以戰無兵奈何受人之命不爲其事非仁也食人之祿不死其難非勇也卒死之 同上

元

齊秉節字子度蒲臺人至元十一年從丞相伯顏攻武磯堡擒宋將閻都統十七年授明威將軍二十三年移鎮饒州安仁劇賊蔡福一叛秉節與有司會兵討之擒福一餘黨悉平 元史

王都中字元俞福寧人初爲郴州路總管以神明稱遷饒州路總管年饑米價翔踊都中以官倉之米定其價爲三等言於行省以爲須糶下等價民乃可得食未報又於下等

價減十之二使民就糴時宰怒其崇擅都中曰饒去杭幾二千里比議定往還非半月不可人七日不食則死安能忍死以待乎民相與言曰公為我輩減米價公果得罪我輩當鬻妻子以償時宰聞之乃罷郡歲貢金而金戶貧富不常都中考得其實乃更定之父老或以兩岐之麥六穗之禾為獻都中曰此聖主之嘉瑞非臣下所敢當遂以聞於朝以內憂去郡民為立祠同上

卜天璋字君章洛陽人皇慶間以浙西廉訪副使改授饒州路總管既至事無苛擾民大悅版籍為清時省臣妄作威福郡縣爭賂覲免饒獨無有省臣銜之將中以危法求其罪無所得縣以饑告天璋即發廩賑之僚佐持不可天璋曰民饑如是必俟得請而後賑民且死矣失申之責吾獨

任之民賴全活其臨事無所顧慮若此火延饒東門天璋具衣冠向火拜勢遂息鳴山有虎為暴天璋移文山神立捕獲之以治行第一聞陞廣東廉訪使同上

郭郁字文卿大梁人皇慶間浮梁令善為鈎距以廉民隱自比趙廣漢聘吳仲遷為弟子師士風丕變政為江南諸邑最民謠云桃李陰陰六萬家下居民不識官衙甘棠喜有千年政美玉終無一點瑕林志

移刺迪字蹈中白霄人樞密忠靖公子元統間為饒州路總管講學行禮均役省刑歲旱三禱三應代去民感之為立去思碑同上

韓鏞字伯高濟南人延祐進士朝廷慎選守令魏中立言於帝當今必欲得賢守令無加鏞者帝乃特署鏞姓名授饒

州路總管饒之為俗尚鬼有覺山廟者自昔為妖以禍福人為盜賊者事之尤至將為盜必卜之鏞至即撤其祠沉土偶於江凡境內淫祠不合祀典者皆毀之俾俊秀入學宮求宿儒為五經師月必考訂課試以示勸勵由是饒之以科第進者視他郡為多鏞自奉淡泊僚屬亦皆化之朝有使於饒者鏞延見郡舍供以糲飯亦無後言十年拜中書叅知政事

元史

潘敏中濟南人至正間饒州路推官平冤獄有神蛇之異天

台陶凱詩略曰潘侯理獄市雪冤類神明又曰蛇冤涉幽

怪事近猶足徵

林志

烏樞字季言河陽人至正間知餘干嚴明廉幹興廢舉墜訟簡賦均士民樂之六年淮兵破餘干挾印詣浙江行省請

兵復州治授饒州路總管

明一統志

魏中立字伯時濟南人歷官至陝西行臺御史中丞遷守饒州賊既陷湖廣分攻州郡官軍多疲懦不能拒無賴子弟乘間竊發不旬日眾數萬中立聞警即率丁壯分塞險要戒守備俄而賊至中立以義兵擊却之已而賊復合遂為所執以紅衣披其身中立叱之須髯盡張大罵不已遂被害

元史

萬聚泗州人至元間知浮梁縣恤民興學百姓安之嘗謂家

曰民頗德我死必葬我於斯子孫如其言葬於治東

安志

笄勝丹陽人為德興丞性廉介歲旱設法賑饑詣東嶽祠責躬禱雨輒應民為刻石立祠祀之

同上

明

宋炳字景光合肥人明初饒州總制閩蕭名來寇與知府陶安嬰城拒守明日賊架船百艘犯南門炳率眾射之矢如雨注俄報賊攻北門門外有浮屠賊躋瞰虛實炳設疑兵眩之注以火箭賊技無所施會江西援至賊奔潰捷聞賞勞有差城東西北三面卑隘炳增高之又建旗纛廟守禦廳譙樓民不知擾

府志

鄭選靈璧人明初授武略將軍守禦饒州相原隰度營基躬立規法曲盡其材士卒莫不感奮逋寇唐丑人等作亂選與同知唐魯之謀擊平之民賴以安饒人為之立祠

明一

統志

李寧明初知餘干材敏有斷盜起攻城寧率鄉兵擒其渠殺之復搜山澤散匿者三百人正其罪歲大饑移粟賑濟民

懷其惠

餘干志

按元元貞元年升饒州路餘干樂平浮梁三縣為州至明洪武二年仍改為縣凡屬二年以前者俱稱州

胡惟孝定遠人明初樂平知州剛果沉毅威德並行乙巳方國華入寇被擒不屈死之

樂平志

李庸淮人洪武初知浮梁招撫流亡田野遂闢時于光部曲橫恣庸每裁抑之

林志

辜臯江夏人洪武初知德興縣宣布號令招撫流亡會寇發乃聚民兵保障時開山煉銅為民患奏請罷之修學校建橋梁開拓榛蕪由是百里之內雞犬相聞

明一統志

殷敏

豫章書作郎敏

洛陽人洪武九年饒州知府為治廉明樂平民有詣闕訴大姓五十餘家謀逆者詔往捕之兵至饒州敏



西江志 卷六十三  
驚曰樂平民素淳朴未必有此吾為郡守不可使吾民死  
無辜請先往察之至則皆耕牧如常時於是五十餘家得  
盡釋而誅妄告者府志

馮允洪武中知餘干縣訪民隱戢吏奸政治嚴明舊有囚逸  
獄不能獲允以計廉得之經歷魏宗文貪墨條具以聞寘  
之法民有被盜殺者子以疑似告逮捕者多允齋沐禱神  
果得殺者性甘淡泊去任惟琴書而已明一統志

李益洪武中為饒州通判後遷知府在饒十有八年習知民  
情寬大不苛細以故民尤愛之永樂初饒境大蝻益徧告  
神祇大雨如注蝻盡死府志

任勉洪武間知鄱陽縣首以禮義廉恥教民公暇即詣學講  
授經史立易見冊分上中下戶凡戶調則檢實以行陞知

瀘州鄱民如失父母詣闕丐留遂調饒州府同知明一統志

按鄱陽縣志勉字近思華亭人洪武甲戌進士

王文德盱眙人洪武間為浮梁令正版籍以均力役覈田畝  
以正稅賦興學校以敦孝弟民到于今稱之林志

汪進開元人洪武間為浮梁丞定徭役正版籍時巨盜潘臘  
生余回祖等聚劫進捕殺之浮梁志

葉砥永樂中知饒州府虛心延訪民間利病而興除之務息  
詞訟郡有盜窰勞夫役奏減四之一民皆稱便明一統志

趙濬恭定海人永樂中知德興縣會大疫田疇多蕪濬恭計  
口授田籍民力強弱為三等以定差役歲歉濬恭自貸於  
富室約秋成還之民免於饑卒於官民頌之曰前有辜父

後有趙母

林志

曾鼎一名真保字文鼎宣德元年知浮梁縣儉約平易政務便民鄉有水莽毒草民多自服誣訟鼎反坐之其風遂息秩滿以乞留復任二年民思其德立祠祀之

浮梁志

張泳字思濟武進人宣德間以儒士授鄱陽縣丞時旱饑泳發預備倉以賑復捐俸煮粥徧詣鄉落召集居民視菜色甚者勸有力家分養之助以官穀不足請發大有倉巡撫趙新從之得米八千餘石賴以全活者甚衆又力請蠲租獲免二萬石民甚德之

府志

王佐蘄州人景泰間知饒州諒直平易廉介緝密先任徽州同知去則民上章挽車以留之及去饒如去徽明年饒民聞佐再來趨迎爲之罷市謠曰王佐再來天有眼其得民

心如此

林志

邵崑桐廬人天順間知餘干縣振學校去奸胥時邑患虎崑自責禱神虎相繼去已卯夏旱崑虔禱三日雨如注秩滿

陞撫州同知

同上

吳繹思莆田人成化間知德興縣政務愛民懲吏均徭役勸農桑葺文廟樹成德達材二坊去後十年民思之立碑以

紀其績

德興志

劉渙江陵人成化間爲鄱陽令清慎廉明愛民禮士治爲江西最築圩堤以捍水患長數千丈得田數千畝鄱民賴之以督役得暑疾卒民哀痛如失父母

林志

陳崇字德崇淮安人成化間知樂平縣建譙樓勑便民倉及吳口橋公私便之於學校尤惓惓朔望集諸生講討無倦

林祥字世祥莆田人弘治間任饒州教授以正律已遇諸生不啻父兄之於子弟貧不能婚喪者倡義周之因而死者匡之性敏而才者誘掖之諸生懷其德為建思服亭陞國子助教林志

陳策字嘉言無錫人正德間知饒州勦撫姚源賊建萬年縣修葺郡志人至今稱之府志

胡軒字士榮餘姚人正德間由兩淮運同擢守饒州適萬年初建洞民桀黠者乘釁竊發軒廉其狀悉平之邑賴以安擢兩淮運使同上

張萱字德輝上海人正德間知鄱陽性方嚴民訟立決贖鍰不入私帑吏不敢欺呼為張鐵面安志

趙德剛閩縣人正德間知德興縣甫下車值姚源寇至邑無城伐木為柵與賊角時憲使統兵者欲以金錢啗賊趙謂民困安可重斂遂身入賊巢諭以義被執計脫誘致賊黨數十人戮之賊引去歲大饑遣邑耆民蔣喜疏請於朝力陳疾苦得蠲三年賦又得賑金七千八百餘兩民始獲甦為立碑頌其德同上

馬津字宗孔滁州人正德間餘干知縣宸濠反津偕進賢知縣劉源清起兵討賊以功擢監察御史明史劉源清傳

孫天祐正德間任龍津驛丞會宸濠反天祐起兵拒賊賊七殿下者奪運舟於龍津天祐與戰殺數人賊黨募兵過龍津天祐追殺之焚其舟賊黨婁氏家眾西下亦為天祐所遏擒七十餘人賊兵不敢經湖東者天祐力也同上

西江志 卷六十三  
周振字仲玉武進人嘉靖七年知餘干縣時水旱頻仍振悉心賑給又開新河廳事前槐木已枯復茂人以為德感府志

阮屋應天人嘉靖間知浮梁縣築北湖開南路興學校去之日歸無餘貲同上

許公高南部人嘉靖間知德興縣建文廟置學田性儉約如寒素於上官禮節餽遺節省無溢有部使者過公高不禮之寄宿民舍使者知其素行亦不為恨擢大理評事同上

汪宗伊字子衡崇陽人嘉靖進士除浮梁知縣累官兵部郎中楊繼盛劾嚴嵩及其孫鵠冒功事宗伊議不撓忤嵩自免歸歷仕至戶部尚書卒諡恭惠明史汪文盛傳

按饒州府志稱宗伊在浮梁飭學宮毀淫祠禮士子戢

### 豪民循績甚著

黎楚字子立順德人嘉靖間由舉人知樂平縣廉明果斷時有惡少釀禍楚廉其首亂者十數人置之法境內肅然邑故無城楚奉檄建築規畫一定不踰年而告成安志

姜廷頤字以正巴陵人嘉靖進士知餘干縣減徵收稅糧令民自封自兌歲省羨千金擢御史歷官兵部尚書同上

陸鳳儀蘭谿人嘉靖進士知餘干縣遷學宮於東湖革火耗均徭役他邑訟不決者監司多屬鳳儀決之擢給事中府志

謝汝韶長樂人隆慶間知安仁縣改建學宮行條鞭法刻錦江政略民為立碑祀之同上

尤拔俊崇德人由舉人萬曆間知安仁勤於撫字尤留心好

西江志 卷六十三  
士拓城於泮宮前開雲錦門以納秀氣入觀舟過湖口見  
權稅厲民入京即抗章罷止之 安仁志

陳吾德字懋修歸善人嘉靖進士張居正柄國出為饒州知  
府有盜建昌王印章者遁之南京見獲居正客操江都御  
史王篆坐吾德部下失盜謫馬邑典史又劾其莅饒時違  
制講學用庫金市學田遂除為民 明史列傳彙

李際春武進人萬曆進士知浮梁縣廉介不畏強禦自署榜  
聯云視聽自民視聽饑寒猶已饑寒臨行家僮偶帶署中  
一竹簾越境知之擲還人服其清德 府志

蘇萬姓湖廣人萬曆間由舉人知餘干縣時水旱洊至捐帑  
勸糶屢請改折民賴以甦蠲火耗培士氣旌善人禁溺女  
為政皆可紀者 同上

何鏞泰興人萬曆間知德興縣廉介恬靜錢糧稍羨餘召納  
戶還之邑界三省多盜鏞窮治之盜為衰息建興賢書院  
以課士捐俸市田以給廩餼以艱去士民思之 同上

王如春黃巖人天啓進士知餘干值洪水泛溢出俸賑濟上  
請減徵改折復捐贖自龍津至壩口甃窟築堤數十里民  
稱為王公堤 餘干志

成勇字仁有安樂人天啓進士授饒州推官謁鄒元標於吉  
水師事之中使至知府以下皆郊迎勇獨不往且捕笞其  
從人中使將愬之忠賢會敗獲免丁內外艱歷開封歸德  
二府推官 明史列傳彙

按饒州府志稱勇在饒時有武宦家園亭當事競游賞  
之獨不能邀其一盼其風裁矯俗如此

王永吉字鐵山高郵人由進士崇禎間補饒州司理下車風采凜然爰書填委剖決如流讞大獄理沉冤多所平反時徵輸積弊已久加以練餉均輸吏胥因緣為奸因取各邑額冊研筭為清賦大綱皆有成法宿弊一清

安志

國朝

翟鳳翥字象陸聞喜人順治三年進士六年守饒州兵燹後瓦礫極目鳳翥招流移勤撫息又為詳請蠲荒蕪糧稅八萬有奇郡學圯移建故藩舊址宮牆巋然又建芝山錦雲東山諸書院講學課士士風丕變五載奏最晉本省興屯道招撫屯民五萬餘名增穀二十二萬石公私贍足擢陝西按察使士民為之立祠

安志

王起彪字虎子錢塘人順治丁亥進士戊子值金聲桓之亂

隨征營中己丑春始莅德興時巨寇雖平餘孽乘間竊發鄰邑曹董二賊擁眾猝至彪率眾禦之力不支賊劫之去不屈遂被害

同上

婁維蒿字中立直隸人順治七年知浮梁縣兵火之餘設法招徠捐資建倉勘田除實荒田二千餘頃民至今頌其德

浮梁志

程瀚字瞻菴上元人順治乙未進士知安仁縣邑接撫界有東鄉寄莊為官民病者數百年瀚至申詳立寄莊單頭分戶同本邑徵比自是邑民無賠額之苦寄戶亦免頑抗之累以疾卒官百姓哀之

安志

鄭邦相字又僑咸寧人順治戊戌進士知鄱陽縣天資明敏勇於奉公無滯獄無逋賦緝盜安民一時稱之

府志

江南齡浙江人順治戊戌進士康熙二年知餘干縣兵燹後首建文廟置祭器復勅東山書院每月兩課諸生親加評閱修葺縣志搜訪無遺陞山西太原同知餘干志

郭萬國許州人知饒州府康熙十四年五月耿逆陷城殉難事聞贈光祿寺卿安志

范文英遼東人任饒州同知偕萬國死耿逆之難事聞贈叅政同上

王臨元平山衛人順治辛丑進士康熙九年知浮梁縣十三年七月廿二日山賊破城殉難自縊贈江西按察使僉事同上

王萬鑑臨海人知萬年縣康熙十四年五月耿逆陷城殉難事聞贈叅政同上

陸之蕃會稽人任鄱陽縣丞康熙十四年五月耿逆陷城殉難事聞贈僉事同上

翁鳳翥鄞縣人任石門巡檢康熙十五年閏五月內耿逆陷城殉難事聞贈經歷同上

李崇道清苑人任饒州稅課司大使康熙十四年五月耿逆陷城殉難事聞贈經歷同上

西江志卷第六十三

西江志卷第六十四

名宦八

南康府

唐

申稷大曆中為建昌令政平訟理流民復業鄰邑慕之來歸

者眾戶口日增乃分修智鄉置新城鄉林志

韋遂元和中令建昌為政清簡處事寬和田野闢戶口增乃

分孝弟鄉與靖安里為二鄉同上

崔迅會昌中令都昌公勤撫恤始成井邑民甚賴之同上

何易于會昌中攝建昌令政教有方築堤防水民享其利民

歌曰我有父何易于昔無儲今有餘明一統志

陳杲字可大咸通中知都昌縣民苦水患築長堤以障之自



是民賴以安名其堤曰陳堤 林志

孫永咸通初為建昌令築堤捍水造橋以渡民甚便之 明一

統志

邵師裕咸通中為建昌令以德治民鄰境慕之多來歸附故

老以卜鄰名鄉蓋取王翰卜鄰之意 豫章書

南唐

朱弼南唐時為廬山國學助教動持禮法每升堂講釋生徒

環立執經問難應聲解說莫不造理諸生成服四方肄業

者多造焉 明一統志

李善道南唐時為廬山國學主教學徒數百人皆為時望今

祀於白鹿洞 南康府志

宋

洪沂慶曆初知都昌縣教民以陶瓦代竹一邑便之不週歲

民安物阜政事一新邑人為立坊曰新政 林志

魯有開字元翰叅知政事宗道從子也用宗道廕知韋城縣

尋知南康軍有古循吏風代還熙寧行新法王安石問江

南如何曰法新行未見其患當在異日也以所對乖異出

判杭州官至中大夫卒 宋史

陳舜俞字令舉浙之嘉禾人熙寧三年以不奉新法且上章

自疏謫監南康軍酒稅五年而卒凡名勝多所題詠 林志

徐師回元豐中知南康軍性耿直設施有條公暇建亭於明

月泉上曰吾欲守廉如此水之清又建堂植八杉號曰直

節曰吾欲守節如此杉之直蘇子由為記後朱元晦至求

其遺跡不存獨廳事南有堂無額庭中有老柏生意殆盡

而屹立不僵因取直節名堂焉 豫章書

朱熹字元晦一字仲晦徽州婺源人紹興十八年進士淳熙五年知南康軍至郡值歲旱講求荒政多所全活閒詣郡學引進士子與之講論奏復白鹿書院創立學規人皆遵守明年大旱應詔條具民間利病除提舉江西常平茶鹽公事旋錄救荒之勞除直秘閣以前所奏出粟人未推賞辭歷官寶文閣侍制致仕卒年七十一謚曰文寶慶三年贈太師追封信國公紹定三年改徽國公淳祐初從祀孔子廟廷有文集百卷生徒問答八十卷別錄十卷 宋史

樓攻媿集

錢聞詩淳熙間知南康軍博覽經書崇尚儒雅撤新書院修

築石堤復釋菜之禮增養士之田士民戴之 林志

朱端章淳熙間知南康軍寬以愛民廉以律已撥設官田七百餘畝於洞學以贍四方之來學者 同上

張南金慶元二年為星子令廉明純正號令詳審案牘嚴肅囹圄空虚邑內藹然有禮讓之風累官至戶部侍郎 林志

王仲傑慶元初知星子縣嘗督創白鹿書院朱子稱其老成忠厚民甚愛之 安志

黃桂嘉定間知南康軍築左蠡城 府志

趙師夏嘉定間知南康軍奏以星子縣請稅錢對補上供撥梅洞寺田及魚池入三縣社倉善政甚多 豫章書

陳宓字師復丞相俊卿之子少嘗登朱子之門嘉定七年入

監進奏院上封事言宮中宴飲無節非時賜予丞相史彌遠不樂出知南康軍詣史彌遠別彌遠曰子言甚切當第愚昧不能行殊自愧耳至官歲大侵奏蠲其賦什之九會流民羣集宓就役之築江隄而給其食時造白鹿洞與諸生討論改知南劍州 宋史

張處字子宓慈谿人慶元進士遷祕書丞改著作郎以疾乞外出知南康至郡剖決滯訟衆皆悅服前守陳宓以錢七千緡置濟民庫爲築城費處至曰不必取贏於民吾捐萬緡爲倡繼事倘不已何患事之難成轉運使以錢萬二千緡置平糶於郡處復出錢萬二千緡以增益之民賴其利將增建禁旅營地屬民者索質劑視元直償之徙知處州歷官工部侍郎兼國子祭酒 同上

陸德輿淳祐間知南康軍亟議賑恤以郡有累年蓄積羨餘錢築倉以儲之名曰淳祐義廩民多賴焉 林志

陳淳祖知南康軍造福星臨津定波倉步四門修五老門築儒良隘增益兵糧倉重建滄波觀作水亭稻亭功蹟甚多 林志

袁從修寶祐間知南康軍表章忠義修靖康死難忠臣張忠確公叔夜墓以冰玉諸公附祀後從祀於二賢祠 安志

趙與夔景定間知南康軍覈實社倉復還原額修軍學二祠堂繕治城池造軍衣弓矢旗幟等器百廢俱興 豫章書

劉溥漢咸淳間知南康軍首行淳熙荒政捐俸振貧節用買田置惠民倉撥廢寺田穀助星子縣月解軍糧創白鹿洞貢士莊修流澌橋愛民重士興利補弊善政爲多 明一統

元

陳炎酉至元間為南康路總管修築白鹿書院興學賑饑招集流亡四萬餘口有麥秀兩岐之瑞修心會軒宇宙山亭  
民立祠祀之 明一統志

王彥弼蠡之博野人為南康路總管督諸縣定民產高下徵役視農事急緩流亡者悉復業焉三歲再蝗冒暑率民吏驅瘞不能為災燬石修朱子所造江岸石閘以禦風濤商旅泊舟得安改江州路總管除前官屬政暇日詣郡庠及濂溪景星兩書院勉勵士學咨詢民瘼郡庠日就推壓出學廩之粟各二百斛畀四士分任其責一瓦一木不以煩有司自禮殿從祀講堂門廡煥然一新郡城北瀕大江城

壞無敢完補公慨然興築其夏水大至郡民皆曰公實生我蜀人范大性數十年寄隱造其廬命子事之以師禮錄其所著易輯略以傳江州任滿還蠡不復仕 吳澄撰墓碑

徐君寶至元中為建昌州判時夏苦雨民艱食立券假官吏俸與穀百餘石以賑之至秋民輸穀以納復捐俸為義倉寮屬與州人慕義者悉出穀以助得五百餘石立士人掌之水早有備民無凶荒之虞 豫章書

蔡瑛字子華至正初令星子為政廉明商人子李冬兒為人誘去其父誣保安千戶篤的樞謀殺獄具未決瑛至訪之得冬兒不死實密使人致之冤獄遂釋 林志

孫天民字可達濟南人至正間南康路總管平心治人有清節多善政建譙樓修學宮凡學田見侵者悉復之 豫章書

明

王禕字子充義烏人太祖征江西禕獻頌喜曰江南有二儒

卿與宋濂耳尋掌起居注己命同知南康府事賜金帶寵

之居官有惠政太祖即位召還議禮洪武五年命禕齋詔

諭雲南遇害詔贈翰林學士諡忠文

明史列傳葉

呂明當塗人甲辰年知南康府時兵戈初息流民四散官民

解宇鞠為茂草乃即僧寺創草舍署事招撫流移躬行田

野以督耕桑不事刑威惟訓以義諭以法民皆感化無敢

梗者

明一統志

朱敏字悅道義烏人洪武五年以監察御史改知星子縣興

學勸農奏減稅糧茶貢以遷去民常思之

林志

卞同姑蘇人洪武間知都昌縣撫牧有方政聲丕著擢河南

知府

明一統志

李守中湖州人洪武中知南康府廉潔自持薪水之外一毫

不取於民

同上

林士敏莆田人洪武中由郎中知南康府文學政事皆擅名

於時歷任既久民猶愛戴之

林志

胡龍福建人洪武間任星子縣廉勤公正蔬食布衣除革吏

弊民深服之擢監察御史

同上

唐冕順慶人永樂初知星子縣剛介廉明案無留牘時田廣

民稀奏召鄰邑無田者八百餘家占籍佃種田免荒蕪民

生日庶

明一統志

楊鐸永樂間知星子縣撫字有方他郡民來歸者四百餘家

同上

劉麒閩縣人宣德初由御史出知南康府作新士類勸課農  
桑政治聿興士民戴之 林志

翟溥福字本德東莞人永樂進士知新淦縣遷刑部郎正統  
元年七月詔舉廷臣堪為郡守者擢南康知府先是歲歉  
民有擅發富家粟及收取漂流官木者前守悉坐以盜當  
死者百餘人溥福閱實杖而遣之地濱鄱陽湖舟遇風濤  
無所泊為築石堤百餘丈往來者便之廬山白鹿洞書院  
廢溥福倡眾興復延師訓其子弟朔望躬詣講授考績赴  
部以年老乞歸侍郎趙新嘗撫江西大聲曰翟君此邦第  
一賢也胡可聽其去懇請累日乃許之辭郡之日父老爭  
贖金帛悉不受眾挽舟涕泣因建祠湖堤祀之又配享白  
鹿書院之三賢祠 明史列傳藁

按明一統志作翟溥今據明史改正

陳敏政錢塘人景泰中由通判擢知南康府秉公持正翼善  
鋤強復社倉修石堤建白鹿書院百廢具舉民不告勞郡  
人思之從祀三賢祠 林志

按明一統志作陳敏今據林志改正

孔鏞字韶文長洲人景泰進士為都昌知縣戶分九等以定  
役設倉水次便收斂民甚賴之 明史列傳藁

何濬河南人成化初由舉人知南康府時值大旱移檄鄰郡  
貸米萬斛以給饑民全活者眾興學勸農政教兼舉 林志

許顥字孟敬安陽人成化間以太僕寺丞出知南康府政令  
嚴明開河道以通商旅實義倉以備荒歉修葺文廟禱雨  
輒應士民懷之 同上

西江志 卷六十四  
吳紳歛縣人成化間由舉人知都昌縣宅心平恕為政有方  
興利革弊民皆向慕歷官至都轉運使 同上

曹凱字宗元益都人成化進士由叅政左遷衛經歷尋擢南  
康知府豈弟慈祥廉明剛果剖決如流囹圄空虛積粟備  
荒招集流散編戶日增政治為之一新 同上

劉定昌綦江人弘治進士知南康府知大體謹細行興學校  
建書院有古循良風卒於官百姓哀之 同上

按明一統志作劉定安志作正德間任

劉幸慶州人正德間知南康府為政公勤操持清慎建府治  
不費公帑民爭先趨之卒於官 同上

按明一統志作劉章

林寬莆田人正德間為南康通判當宸濠兵燹之後招四邑

人民歸耕及剿九姓漁戶都御史王守仁唐龍交薦其才

安志

張愈嚴耆州人正德進士知南康府當兵燹之後節財愛士  
安輯流亡均平里甲賑恤貧民入覲卒於途歸櫬南康老

穉為之巷哭 同上

陳嘉言薊州人嘉靖間星子典史流賊劫掠商舶嘉言督義  
男與邑民宗允春等二十四人追至四山流賊縱擊救援  
不至遂被害義男及允春等俱溺死 同上

吳寶秀字汝珍浙江平陽人萬曆進士授大理評事二十六  
年出知南康府湖口稅監李道橫甚寶秀不與通會漕舟  
南還乘北風揚帆直入湖口道欲權其貨遣卒急追之舟  
覆有死者道即遣爪牙吏持牒捕漕卒寶秀拒不發道大

怒飛章劾寶秀及星子知縣吳一元青山巡檢程資阻撓  
 稅務詔俱逮治寶秀妻陳氏慟哭請偕行寶秀不可乃括  
 餘貲及簪環得銀三兩許付寶秀曰夫子行以為路費夜  
 自經死寶秀至京下詔獄星子民陳英者方廬墓儒士熊  
 應鳳等走京師伏闕訟冤乞以身代大學士趙志臯疏救  
 皇太后亦聞陳氏之死從容為帝言因與一元等並釋為  
 民歸家踰年卒初南康士民建祠祀陳氏後改建合寶秀  
 祀之天啓中贈太僕少卿

明史列傳藁

李應昇字仲達江陰人萬曆進士授南康推官出無辜十九  
 人於死寘大猾數人重辟民服其公廉為之謠曰前林後  
 李清和無比林謂晉江林學曾以清慎著稱者也九江南  
 康間有柯陳二大族相傳陳友諒苗裔負固強梗嘗拒捕

有司議兵之應昇單騎往諭皆叩頭請命出所匿罪人一  
 方以定徵授御史以忤魏忠賢削籍詔獄酷掠斃之年甫  
 三十四崇禎初贈太僕卿諡忠毅

同上

按東林列傳應昇在南康律已清嚴公庭如水出其緒  
 餘陶鑄多士白鹿洞書院久廢應昇為興復之立館舍  
 招集人士旬有小會月有大會會期親詣洞宿與諸生  
 質疑問難推明紫陽之教一時從遊學者千里應之其  
 成名於世者指不勝屈本傳失載因并錄之

何起龍成都人天啓初為南康同知有幹才署建昌縣初鄱  
 湖有大木伏水中上分兩角舟過為患起龍命習水者曳  
 其木上厓遂以為龍王像置宮亭湖廟至今祀焉自後舟  
 行無恙人德之

安志



張士亨淑浦人崇禎間知安義縣有才能時鄰邑李肅七肅  
十為寇士亨奉檄剿撫民賴以安有平寇錄同上

吳賜玉字輯五江南歙縣人以蔭授南康府通判戈陳賊寇  
南康賜玉手捉鐵鞭率壯丁數十人往剿時賊已去城三  
十里賜玉追及賊阻橋據岡為陣賜玉發一矢中賊冠賊  
拔嗅之曰未傳毒乃下岡返擊賜玉躍馬獨前持鞭格殺  
數賊遂遇害贈按察司僉事徐秉義明末忠烈記

國朝

聶應井四川宜賓人由舉人順治二年知南康府守城禦寇  
地方賴之後隱於廬山子孫遂家焉安志

溫可掬直隸人順治四年任南康通判金聲桓之亂死之同上

九江府

吳

徐盛字文嚮琅邪莒人以勇氣聞以別部司馬統兵五百人  
守柴桑長拒黃祖祖子射嘗率數千人下攻盛盛時吏士  
不滿二百與相拒擊傷射吏士千餘人已乃開門出戰大  
破之射遂絕跡不復為寇吳書

陸抗字幼節孫策外孫也年二十拜建武校尉與諸葛恪換  
屯柴桑抗臨去皆繕完城圍葺其墻屋居廬桑果不妄取  
恪入屯儼然若新而恪柴桑故屯頗有毀壞深以為慙建  
興元年拜奮威將軍太平二年魏將諸葛誕舉壽春降拜  
抗為柴桑督赴壽春破魏牙門將遷征北將軍孫皓即位  
加鎮軍大將軍同上

西江志 卷六十四  
按徐盛陸抗林志俱不載但後漢書郡國志立柴桑縣於豫章郡太平寰宇記云赤烏本柴桑舊域吳書徐盛傳守柴桑長陸抗傳云為柴桑督是宜入九江者因采錄之至若兩漢書所載九江太守有王嘉宋均服虔盧植邊讓諸人考漢之九江所統十四城與今之江西無涉故不敢混載又按九江府志及林志載晉華軼應詹溫嶠劉楨庾亮褚裒庾翼王羲之王允之謝尚桓沖桓伊何無忌劉敬宣孟懷玉庾悅凡十有六人宋王弘檀道濟齊陳顯達梁蕭秀等俱已采入統轄名宦皆以江州刺史都督數州軍事者所轄甚廣不得以九江一郡當之也又晉書孟嘉傳只有辟廬陵從事之文應入吉安乃安志府志又以為州別駕闡入今依本傳止載吉

安

南齊

庾弘遠字士操清實有士譽為江州長史時刺史陳顯達舉兵敗斬於朱雀航將刑索帽著之曰子路結纓吾不可以不冠而死謂看者曰吾非賊乃是義兵為諸君請命耳陳公太輕事若用吾言天下將免塗炭弘遠子曜年十四抱持父乞代命遂併殺之

南齊書

唐

鄭善果鄭州滎澤人貞觀初為江州刺史善果母崔賢明曉政治嘗坐閣內聽善果處決或當理則悅有不可則引至牀下責媿之故善果所至有績號清吏云

唐書

李芘字茂初趙州人李勉觀察江西表芘署判官永泰初劇

西漢志 卷六十四  
賊方清陳莊西絕江路劫商旅為亂支黨盤結芄請以秋  
浦置州勉是其計奏以宣之秋浦青陽饒之至德置池州  
即詔芄攝行州事後魏少游代勉表署都團練副使攝江  
州刺史 同上

韋應物京兆長安人建中三年出為滁州刺史久之調江州  
追赴闕改左司郎中復出為蘇州刺史應物性高潔所在  
焚香掃地而坐惟顧況劉長卿丘丹秦系皎然之儔得廁  
賓客與之酬唱其詩閑澹簡遠人比之陶潛稱陶韋云 全

唐詩小傳

韋辭字踐之以兩經擢第累官侍御史以事累出為朗州刺  
史再貶江州司馬長慶初韋處厚路隨以辭望居顯要有  
文學理行亟稱薦之歷潭州刺史湖南觀察使 九江府志

白居易字樂天其先太原人徙下邳敏悟工文章未冠謁顧  
況况曰吾謂斯文遂絕今復得子矣貞元中擢進士補校  
書郎元和元年召入翰林為學士遷左拾遺四年旱居易  
建言乞盡免江淮賦以救流瘠且多出宮人憲宗頗采納  
累官拜左贊善大夫是時盜殺武元衡居易首上疏請急  
捕賊刷朝廷恥宰相嫌其出位不悅貶江州司馬既失志  
能順適所遇託浮屠生死說若忘形骸者久之徙忠州刺  
史歷官太子少傅會昌初以刑部尚書致仕卒贈尚書右  
僕射江州人為立祠 唐書

王鏐字昆吾太原人嗣曹王臯為團練使俾鏐誘降武岡叛  
將王國良以功擢邵州刺史臯之節度江西也李希烈南  
侵臯與鏐兵三千使屯潯陽而臯全軍臨九江襲蘄州遂

以西江志 卷六十四  
以衆濟表鏐江州刺史鏐小心善刺軍中情事無小大臯  
悉知之因推以腹心累官同中書門下平章事卒贈太尉  
同上

錢徽字蔚章吳郡人起子貞元初進士長慶元年爲禮部侍  
郎忤宰相段文昌貶江州刺史初州有盜劫貢船捕吏求  
盜不得乃取江濱惡少年二百人繫訊徽按其枉悉縱去  
數日得真盜州有牛田錢百萬刺史以給宴飲贈餉者徽  
曰此農耕之備可他用哉命代貧民租入歷官吏部尚書  
致仕卒贈尚書右僕射 同上

李渤字濬之魏橫野將軍申國公李發後元和九年以著作  
郎出爲虔州刺史奏還信州移稅錢二百萬免賦米二萬  
石廢冗役千六百人觀察使上狀不閱歲遷江州刺史度

支使張平叔斂天下逋租渤上言度支所收貞元二年流  
戶賦錢四百四十萬臣州治田二千頃今旱死者千九百  
頃若徇度支所斂臣上不能奉詔下不忍民窮無所逃死  
請放歸田里有詔蠲責渤又治湖水築堤七百步使人不  
病涉入爲職方郎中進諫議大夫太和中召拜太子賓客  
卒贈禮部尚書 同上

劉秉仁乾符間爲江州刺史賊李彥章者掠江西秉仁乘驛  
之官單舸入其水寨賊出迎請降秉仁執其渠魁斬之散  
遣其衆百姓安堵 豫章書

塗曉僖宗時以中散大夫爲江州刺史以廉能稱當時士林  
重其才品號爲金聲玉色 同上

南唐

西江志 卷六十四  
廖凝字熙績衡山人少隱居南嶽江南賊起凝曰與其抱道  
以死孰與就義以存吾宗遂出為彭澤令慕陶處士為人  
已而笑曰淵明不以五斗折腰吾寧久為人役即解印歸  
衡山 十國春秋

周宗字君太廣陵人常給使烈祖左右及烈祖鎮金陵宗為  
都押衙既贊禪代累遷樞密使初俞文正為烈祖幕賓而  
宗及馬仁裕皆從給使至是宗出鎮江州文正猶為九江  
巡官輒問宗曰馬押衙何在宗笑曰馬相公出鎮浙西久  
矣文正嘗與公宴俛首詐曰下官飲量甚局令公素知之  
座皆愕然而宗不之罪其寬厚類如此 馬令南唐書

皇甫暉魏州人歷歙州刺史神衛軍都虞候江州節度使周  
師攻淮南為北面行營應援使會劉彥貞姚鳳兵以行彥

貞舉動躁撓人測其必敗暉獨持重部分甚整士亦樂為  
用周人頗憚之及彥貞敗死暉鳳退保清流關世宗分兵  
襲清流暉敗斷橋自守周兵涉水踰城入執送壽州行在  
世宗賜之馬及衣帶數日創甚暉不肯治而卒 陸游南唐  
書

胡則後主末為江州指揮使金陵陷曹彬以後主手書喻郡  
縣悉以城降書至江州刺史謝彥賓集將佐視之謀納款  
則憤形於色亟出謂其下曰吾屬世受李氏恩安可負之  
且此書真偽不可知刺史不忠欲污吾州爾輩能從我死  
忠義乎眾皆曰善乃率同列宋得明等大譁入攻彥賓執  
而殺之眾推則為刺史號令肅然堅壁死守太祖命曹翰  
攻之堅不可破翰軍死傷者眾會則疾革不能起城始陷

翰執則將磔之而則已死腰斬其屍

同上

吳舉字大冲永興人後主時為彭澤簿曹彬兵破池陽遣使降郡縣使至彭澤令長欲以城降舉以大義責之且曰吾能為李氏死乃殺使者固守不下及煜既降舉為遊兵所執送大將軍義而釋之

林志

宋

鍾離瑾字公瑜合肥人開寶間德化令守義愛民有女將嫁許氏得一媵女於臨川一日瑾視事歸見女流涕有戚容詰之曰吾父曾令是邑不幸與母俱亡今十年矣適見明府視事追感吾父不覺淚下瑾大驚遂易其衣服養為已女時許氏納采有日瑾以書告緩其期曰吾買媵而得前令之女將輟吾女奩資先嫁之許氏亦惻然報書曰君侯

能抑已女而拔人之孤女盛德事也吾有季子願以為婦卒與俱歸久之瑾夢綠衣丈夫造謝曰不圖賤息辱賜於君今得請於帝奉公十任官祿後果歷十郡太守終江淮發運使

林志

周述太平興國二年為江州刺史施政安民崇尚儒道時白鹿洞學徒數百述上疏乞賜九經令肄習之詔俾國子監給印本驛送至洞

府志

羅彥輔字經世當塗人嘉祐進士調南城尉以捕盜功移江州令南城人有感其德者篋金追送於路彥輔固謝不受用薦改著作佐郎知湖口縣僚吏有誣彥輔者時劉述為郡守曰羅湖口廉吏也按得其情反坐之遷少府監簿復與長官論不合謫江州酒稅或令求直答曰九江去家近

奉親便復何求哉後判和州暨池州尤多政績同上

趙士隆字景瞻太宗之後為郡縣吏累遷至淮南西路兵馬  
鈐轄駐壽春劇賊丁一箭眾號十萬來攻城擊走之以功  
授江東路鈐轄李成叛遣其黨馬進圍九江九江守臣姚  
舜明與士隆及副鈐轄劉紹先禦之時守城罷卒僅數千  
捍賊百餘日城中食盡舜明紹先議縱火因棄城去士隆  
獨毅然糾合部曲餘民守城城破眾號呼曰無殺我趙鈐  
轄賊入城大掠成素服士隆之義欲以為偽安撫使士隆  
怒罵曰賊欲屈我耶陰裂帛以書使示諸子曰賊不殺我  
義不苟活汝輩得出為我雪恥遂仰藥而卒賊怒并害其  
宗數十口事聞上嘉悼贈武功大夫官其孫二人宋史  
趙士道以武翼大夫守官江州紹興五年馬進寇江州士道

遇害贈武德大夫官其家二人同上

葉義問字審言壽昌人舉進士通判江州時豫章守張宗元  
忤秦檜檜下漕臣張常先勘焉宗元道九江常先檄義問  
拘其舟義問投檄曰吾寧得罪不為不祥明一統志

韓彥直字子温世忠子六歲從世忠入見高宗命作大字即  
拜命跪書皇帝萬歲四字帝喜撫其背曰他日令器也登  
進士第秦檜素銜世忠不附和議出彥直浙東安撫司主  
管檜死進直龍圖閣江西轉運兼權知江州時朝廷還岳  
飛家貲產多在九江歲久業數易主吏緣為奸彥直搜剔  
隱匿盡還岳氏復為司農少卿總領湖北京西軍馬歷官  
至顯謨閣學士宋史

劉穎字公實江西運使判江州時德化縣民逃徙大半田盡

荒守臣乞蠲稅不報穎以見種之稅均於荒萊民願耕者  
遞減之於是逃民盡復

明一統志

余崇龜字景望興國州人開禧中守江州新學校築城隍躬  
行阡陌與百姓同勞苦政聲著聞官至兵部侍郎

同上

魏了翁字華父蒲江人慶元進士理宗時官端明殿學士同

簽書樞密院事督視京湖軍馬會江淮督府曾從龍卒并

以江淮付了翁又賜便宜詔書如張浚故事詔宰臣飲餞

於關外酌上下流之中開幕府江州申儆將帥調遣援師

奏邊防十事甫二旬召為簽書樞密院事時以疾力辭改

資政殿學士劔南安撫使

宋史

趙昂發字漢卿昌元人登進士第為彭澤令政尚寬平以忠

孝節義勵俗其奸暴為民患者痛懲之邑人高竹澗精性

理之學昂發數與討論後擢池州通判元兵陷城不屈死

追贈忠毅侯

府志

元

曹靖國大德間為彭澤尹為政簡而廉修譙樓新縣廨平官

道飭水驛建萬里江天亭復淵明祠葺城隍士民感之為

立惠愛亭

明一統志

馮克敏臨清人延祐間為彭澤簿修廢墜景賢哲嘗刊狄梁

公靖節碑及鑄小孤山鐵柱

林志

王國輔魯人至元間彭澤尹初至值水旱相仍民以歉告國

輔憂民不數日髭鬚皤然抗疏乞免民租詔許之

同上

李黼字子威潁人也泰定四年以明經冠多士授翰林修撰

至正間授黼江州路總管十一年夏五月盜起銳意南攻



九江居下流實江東西襟喉之地黼治城濠修器械募丁壯分守要害且上攻守之策於江西行省請兵屯江北以抗賊衝不報黼歎曰吾不知死所矣十二年正月己未賊渡江陷武昌威順王及省臣相繼遁舳艫蔽江而下江西大震賊乘勝破瑞昌右丞孛羅帖木兒聞之遁黃梅主簿也孫帖木兒願出擊賊黼大喜向天瀝酒與之誓言始脫口賊游兵已至境倉卒無號乃墨士卒面統之出戰黼身先士卒大呼陷陣也孫帖木兒繼進賊大敗逐北六十里殺獲二萬餘黼謂左右曰賊不利於陸必由水道以舟薄我苟失備禦吾屬無噍類矣乃以長木數千冒鐵椎於杪暗植沿岸水中逆刺賊舟謂之七星樁會西南風急賊舟數千果揚帆順流鼓譟而至舟遇樁不得動進退無措黼

帥將士奮擊發火翎箭射之焚溺死者無筭行省上黼功請拜江西行省叅政行江州南康等路軍民都總管已而賊勢更熾黼守孤城提孱旅斬馘扶傷無日不戰中外援絕賊至甘棠湖焚西門乃張弩箭射之賊轉攻東門黼救東門賊已入與之巷戰力不敵與從子秉昭俱罵賊而死郡民聞之哭聲震天黼死踰月叅政之命始下事聞贈隴西郡公諡忠文詔立廟江州贈額曰崇烈

元史

陳元愷字時舉鳳翔人至正間守江州尊學校以表章儒先復狄梁公廟崇周濂溪墓葺魏了翁廬人稱損齋先生士

多宗之

林志

黃德隆山東人爲江州萬戶管軍尚節概元末城陷與總管李黼同死於兵因世居高良山之麓

府志

明

黃安泰蘄州人洪武元年知彭澤縣會兵燹後間關跋涉身

勞民事惟以廉勤為政百廢具舉

林志

傅道字士行錢唐人洪武中任德化縣丞清介自持攜二童

隨任偽漢初平民心皇皇田野不治道盡心民事以勤卒

官葬城東欽天山麓

同上

鄭思賢東安人洪武間令德安以廉仁稱秩滿邑民詣闕上

疏留之復任九載政治如初卒於官葬縣山之麓

府志

孔復字士亨博興人永樂初以御史出知九江府宅心仁厚

廉公有威剛明兼濟案牘清而吏弊除田土闢而民生遂

至今民猶頌之

明一統志

王銘建安人永樂中舉孝廉知德安愷悌樂易時邑有虎患

銘禱於城隍一夕雷擊於縣西之箬山隴聿新文廟士民

均感

同上

潘貴候官人永樂中任德安典史邑不習紡績夏稅苧布困

於歲輸貴請於朝改輸綿至今便之

府志

求琰字信圭浙新昌人宣德中授九江通判莅政務崇寬厚

禁民淫祀時敕建天池寺督役者擾民民訴於琰琰遂躬

督之人喜赴工歲歉勸富民出粟賑濟民賴全活

林志

馬驄字馴良臨桂人正統間知德化縣廉慎不私以學校農

桑為務嘗修甘棠堤作煙水亭及新濂溪祠後陞工部主

事未任卒於官葬廬山之麓

同上

鄧周字文郁連州人正統間為彭澤令邑多虎患周曰其咎

在令乃禱之城隍虎引去又多火災乃教民以陶易茅火

遂息

府志

劉仁宅華容人由鄉舉知瑞昌縣流民千餘家匿山中邏者索賂不得誣民反衆議加兵仁宅單騎招之民爭出訴遂罷兵擢廣西副使

明史劉大夏傳

按林志載仁宅下車首陳三疏蠲赤湖虛課二萬緡免舊欠蘆柴十餘萬完逋稅數千石

謝昶黃岡人正統進士天順三年知九江府莅政公勤撫民惠愛以憂去民不忍舍官至右副都御史

明一統志

安永邯鄲人天順中九江府同知廉慎勤勞不事刑威而人自服修甘棠堤以防亢旱構思賢橋以便往來六載卒於官民感慕之

同上

董紱麻城人天順末任湖口令清慎惠民邑有蘇觀渡水齧

堤壞紱重築之民被其澤

府志

常元山陽人成化初知彭澤縣常建議移龍城驛於小孤山遷峰山巡檢司於燕支港減編馬船割鄱陽地四事爲人所稱

明一統志

童潮慈谿人成化間任九江知府莅政公勤撫民仁恕善文章尤勤於修葺卒於官有遺愛焉

同上

按九江郡故無志潮始葺修

周津字文濟慈谿人弘治中知九江府有理劇才均徭役簡詞訟通鹽法盡革買補軍伍之弊尋改調瑞州

府志

王春嘉定人弘治中由舉人知德安縣廉能謹恪百廢具舉而不傷民財尤嚴捕盜境內肅然去之日攀轅者塞道

林志

黃源閩縣人由舉人正德間知瑞昌縣端謹沉毅有節介不為事物屈撓興利祛弊政績丕著

明一統志

蔡元偉晉江人由舉人嘉靖五年知德安縣慨邑衝疲申革浔陽支應力請協濟民蘇疲困拜火反風禱雨輒應遷杭州通判又遷撫州同知

府志

藍淦字可虛閩縣人由舉人嘉靖間令湖口素性清苦以課士勸農為務嘗夜半微行見二婦績久而饑計家中無可為食獨有酒一罌兩婦存其清者飲客而以濁自飲至底無濁置酒歎曰是酒一清徹底有如藍君矣翌日召兩婦勞之曰績至夜分勤也飲濁存清禮也無濁而終不飲儉也以婦人而知賢其上義也厚賜之巡按御史至立清廉貪酷四表令屬吏自揣其行立何位次眾莫敢措步淦攝

衣直趨廉字下御史曰藍令之賢尚未止此當更進一步即以嶺北一人薦之以陞去民遮道攀轅作去思亭

安志

沈詔號龍洲仁和人嘉靖間令湖口銳意任事百廢具興邑故無城詔目擊調兵之擾條陳八議當事咸是之逾年城工成他若葺小學復射圃纂邑志修補文廟祭器政績偉然

同上

朱公節字允中山陰人嘉靖舉人授彭澤令時海寇竊發日閱士增修城守寇不敢窺先是屯軍雜居境內蔑視令有爭訐輒走上官公節令每屯若干出操軍一丁班分之束以伍法給餉屯於小孤分直縣四門守衛同民兵訓練是後就縣官約束軍民一體矣嘗題署云公餘閉閣常思過夜靜焚香獨告天五年擢泰州知州

府志

高裕溧陽人由舉人嘉靖末知彭澤邑戶多虛糧賦役偏累  
裕丈均之作清田紀錄網列條晰賦不擾民

彭澤志

殷乾吳縣人由舉人嘉靖間令德安清介自持奉檄修城動  
支夙羨一千有奇皆百姓積負乾即照數分定牆圍丈尺  
責令修畢民甚稱便民饑多方賑貸全活甚衆

安志

鍾卿東莞人嘉靖進士知九江府七年多善政以清操自持  
臘月解任猶衣葛初擬築南門新壩苦費無所出後歷任  
山西布政使費千金為九江築之

府志

俞汝為華亭人隆慶進士任德化縣邑三洲濱江歲苦水泛  
汝為築堤數千丈以絕產變價為之不煩公私人享其利  
又改里甲為條鞭分限納銀人便之

同上

劉鍾烏程人由歲貢萬曆四年知德安縣作問政堂思艱亭

修築北湖堤民甚便之

府志

邵重祿字孟廉夔州人萬曆間權舟九江盡委府佐於他所  
主守權金暮則貯之郡庫雖巨萬未嘗一寓目汰各役之  
冗關市肅清其妻亦甘貧紡績不倦時以為難

安志

宋子恭榮經人萬曆間以歲貢知彭澤縣盡蠲無藝之征罷  
非時之役邑有飲人以藥而攫之金者覆其事十餘年四  
鄰無能知一日子恭過其門鸚鵡自樓而下投袖中子恭  
異之曰此必有冤訊之果得其狀置之法邑人以為神以  
左遷去士民惜之

同上

謝廷訓晉江人萬曆間令德化強毅有守不以顏色假人戊  
子己丑游饑躬詣潯關坐以待米舫之下水者量其多寡  
而平糶焉時長洲相方柄國吳商以為名廷訓并留之曰

吾為百姓寧恤一官竟以是獲罪去之日父老皆哭送之

府志

吳秀吳江人隆慶進士萬曆間知九江府多所興建開南薰門建甘棠湖開便商河掘老鸛塘新能仁寺塔士民頌之

安志

張紀號浣瀾四川人由舉人萬曆戊戌令湖口廉明豈弟不趨權勢內監李道權湖關商旅苦之紀條病商十四事密上兩臺疏請後罷李道撤湖關皆紀首事也

同上

廖汝恒號密齋恒州人由舉人萬曆間為湖口令奉例丈量戴星履畝一秉於公民便之於下鐘山建立講堂顏曰大觀閣延豐城李見羅主講士皆雲從之

同上

邢有忬昌邑人萬曆進士知九江府操持峻潔民執市中布

為所失盜賊訟而繫之獄株連多死者有忬驗布廣狹不

類盡出之人服其明

府志

白紹光號鏡臺武進人由鄉薦任彭澤令居官清潔愛民禮士歲旱紹光暴日中哀禱大雨如注槁苗復蘇擢吏科給事中

同上

蕭上達沔陽人由舉人天啓間任德化縣清慎慈和民愛樂之時奉檄建魏璫生祠又檄撤各書院上達獨持不報好文下士視一切世味泊如也

同上

李日華嘉興人天啓間任九江府推官嗜古博洽飛翰如流視篆瑞昌仁而愛民邑苦支應馬價條悉具請得減民甚感之有六研堂文集行世

瑞昌志

李正春號瑤液太倉人崇禎間任德化縣耿介剛方歲饑正

春巡關遇米艘下即糴之徧設粥廠民賴以活在任七年  
惟一奚供使而已府志

趙三薦全州人舉鄉試第一崇禎間令瑞昌為人嚴毅有才  
智善於捕盜凡殺真盜幾數百人以不禮漕院承差失官  
地方紳士請復任以備流賊無何陟肇慶同知卒殉難云  
同上

余士常號巨平麻城人崇禎間任九江推官性淡泊平易近  
人每朔望講學陽明書院聞闖賊陷京師慟哭懷宗乙酉  
左逆之變冒刃入營大罵之尋卒於匡廬之麓同上

彭永春武陵人崇禎十五年任九江衛經歷乙酉左逆東下  
春曰春雖微職受國恩不敢從賊具冠帶命一僕舉火焚  
署且大書於屏曰九江衛叅軍彭永春死節處合家男女

六口俱焚死同上

成啓字伯佑應天人以貢任湖口縣主簿乙酉四月左兵圍  
城啓具公服端坐於庭俄而賊兵奄至啓叱曰國家養爾  
將以靖亂何反為亂賊猝之下索金復叱曰寒官也何金  
可索賊舉刃殺之徐秉義明末忠烈記

張懋謙字顧存錢塘人由舉人崇禎間知九江府勵精圖治  
時流賊張獻忠陷蘄黃蹂躪梅廣分掠九江界懋謙多方  
防禦民得安堵無何饑饉洊臻崇禎疫作厲懋謙發粟賑救  
施藥療病築堤修閘治皆可紀九江續志

國朝

席教事號覺海臨汾人明癸未進士順治六年任九江推官  
賦性耿介時有民某妻殺婢而匿其尸反誣婢母家審莫

得其狀教事夜半默禱夢披髮婦泣訴覺而異之次晨復覈得情委官抵其家於菜園內啓屍依律坐罪合郡頌神君焉行取刑部主事

安志

牛森獻縣人順治三年任德安縣清介慈和邑處衝疲值歲凶森多方軫恤安集殘黎踏荒蕪寬稅斂後因軍餉緊急躬催致疾暴卒於通遠驛百姓哀之

同上

董襄號淡園湯陰人順治丁亥進士任彭澤縣居官廉潔免火耗除積盜建學課士皆善政可紀者

同上

崔掄奇字正誼夏邑人以進士官兵部郎中順治間權關九江爲人高邁雅好文章日課士拔其尤時郡火災掄奇捐金每戶賑米一石錢稱是濂溪書院圯立新之復煙水亭構樓以祀古賢爲之記

同上

張僕字貞一深州人康熙五年任德安令邑舊多逋賦僕至洞悉其弊始復遞年里役免其催徵無賠累諸苦更建學宮置營舍橋梁祠宇罔不聿新百姓稱之

同上

江臯號磊齋桐城人順治辛丑進士令瑞昌甫下車即期爲地方作不朽事瑞故水繞城下後改決他去民且病汲里居不蕃臯上請築堤濬壅使水復故道城南一帶煙火數百家衣冠之族亦輩興焉又於漁師渡頭復建高閣下障水口以補東南之闕民甚賴之事具修河紀績陞本郡同知歷四川提學與泉副使

九江續志

江殷道字九同漢陽人順治戊戌進士康熙九年任九江知府甫下車值歲荒捐俸設粥廠不給乃袖蕨根糠粃謁上臺哭請以存留公帑二萬二千餘鎊七千四百餘石發賑



存活甚衆詳請南九衛屯銀四千一百餘兩修學宮以敦根本督課業以育人才築李堤建陶白祠修郡乘培城堞百廢具舉同上

朱儼號恒齋大興人以父之弼蔭由郎中出守九江到任即革諸陋規一切苞苴杜絕念黌宮爲首善地捐俸修理重葺濂溪書院改創公署甲戌年盜案誑誤合郡士民叩閭保留復官值歲饑請米賑濟民多賴之儼清廉慈惠政識大體不屑屑問瓶罍即屢攝上篆而貧益甚在九江凡二十三年以老病罷及卒扶櫬無資士民哭而助之所著有

恒齋集

同上

甯維邦字新周遼東撫順人康熙二十一年令德化廉潔強毅初赴任抵潛山界聞滇師北旋沿江擾甚即星夜兼程

赴任適旗卒有射殺人者走匿舟中維邦廉得卒請置於法滇師聞風懼服自是秋毫無犯舊例征糧責成里長凡十年一輪幫貼無筭奸猾乘機包充侵蝕詳請勒碑永禁民困始甦文廟義學捐囊修葺舊署湫溢不可居毅然鼎建之以病卒於官同上

西江志卷第六十四

西江志卷第六十五

名宦 九

南安府

宋

李夷庚字坦之隴西人初為從事以勤著績漕運康侯表於朝擢南安軍丞至道中陞為守雪冤獄二百餘人毀淫祠四十餘所 林志

按宋淳化元年始置南安軍歐陽忞輿地廣記云南安軍自五代以前地理與虔州同凡南部都尉南康郡國均屬虔州故林志於南安名宦自宋李夷庚始今從之祝深字通甫三衢人至道中知南安軍慈祥愷悌下教立五條曰修學化俗曰飭吏愛民曰清訟省困曰節用下士曰

西漢志 卷六十五  
歲豐時和百姓宜之立祠於學

明一統志

嚴肅字成之大中祥符間由大理丞知南安軍通敏之才正直之氣勸善懲惡民以無訟輦運無滯物產豐盛

同上

周惇頤字茂叔道州人元名敦實避英宗舊諱改焉為分寧主簿有獄久不決惇頤至一訊立辨邑人驚曰老吏不如也部使者薦之調南安軍司理參軍有囚法不當死轉運使王逵欲深治之衆莫敢爭惇頤獨與之辨不聽乃委手板歸將棄官去曰殺人以媚人吾不為也逵悟囚得免移郴之桂陽二年徙知南昌南昌人皆曰是能辨分寧獄者吾屬得所訴矣歷合州判官部使者趙抃惑於譖口臨之甚威通判虔州抃方守虔熟視其所為大悟執其手曰吾幾失君矣今而後乃知周茂叔尋以疾求知南康軍因家

廬山蓮花峰下前有溪合於湓江取舊所居濂溪以名之抃再鎮蜀將奏用之未及而卒年五十七黃庭堅稱其人品甚高胸懷灑落如光風霽月著太極圖說并通書四十二篇嘉定十三年賜諡曰元公

宋史

程珦字伯溫洛人寶元康定間通判南安軍事視周惇頤氣貌非常人與語知其為學知道因與為友使二子顥頤往受業焉敦頤每令尋孔顏樂處所樂何事二程之學源流乎此

宋史周惇頤傳

陳升之名旭避裕陵諱以字行三衢人景祐甲辰進士以校書郎知南康首建學校化民成俗熙寧中拜使相邑人懷之為建坊

林志

劉安世字器之魏人登進士第不就選從學於司馬光咨盡

心行己之要光教之以誠且令自不妄語始光入相薦為  
祕書省正字擢右正言進左諫議大夫尋以集賢殿修撰  
提舉崇福宮才六月召為寶文閣待制出知成德軍章惇  
用事尤忌惡之黜知南安軍蔡京入相連七謫至峽州羈  
管卒年七十八 宋史

程敏叔熙寧間以祕書丞出守南安軍始至訪問利病興廢  
以時既獲豐年廼因餘財改作學宮 彭汝礪南安學記

曹登紹聖間為南安太守以治郡顯聞所至必建學故南安  
之學甲於江西 蘇軾南安學記

郭見義字季勇河南人紹興間南安軍學教授立周程三先  
生祠於學撰記立石 府志

都潔字聖與京口人學邃於易有易說行於世紹興中知南

安軍勤身率下宣布德澤囹圄空虚年穀豐登移守南雄

士民猶相率候問戀慕不已 林志

李聞之開封人紹興中知南安軍寬嚴得中待士以禮復城

東廟學之舊補書籍之遺嘉惠來學郡人德之立祠於學

官 府志

范振紹興中知南安軍上書論雇募耆戶長干事高宗稱其

關民利病言多可采 明一統志

黃謙字牧仲三山人乾道初以進士知大庾縣母老留婦養

於家謙乃單車之官為政勤明嘗攝南康父老吏民相率

遮道留之至為感泣 林志

黃由庚字道卿建寧人乾道中知南康時猾吏姦民表裏夤

緣由庚正其詭弊人不敢欺嘗置學田以贍士既去民立

祠祀之府志

李大正字正之建安人淳熙中知南安軍適郡賦稅不辦豪猾梗治大正理賦稅計利害務窮其源一郡肅然每坐宴閣聽事終日忘倦暇則習射於後圃云林志

管銳南陽人淳熙中知南安軍勤政愛民增修學舍士民懷之立生祠學宮額曰頌禧堂同上

方崧卿字季申莆田人淳熙間擢知南安軍事廉勤平易嘗與教授許開修南安軍志府志

趙孟適號菊山淳熙中知南安軍以廉勤為政以孝弟教民其於學校尤加意焉歐陽守道南安學記

王式字用之曲江人年十四舉進士授祕書省校書郎歷南安司理清謹自守而發姦摘伏一郡咸以為神府志

戴翼字汝諧三山人紹興中攝南康鼎勦城壁兩新縣治政

績著聞林志

梁現番禺人寶祐間知南康捐俸增修祭器課訓諸生舉行射禮士民懷之同上

胡泓紹定間知上猶縣築城為民捍禦後令李申巽藉此以禦元兵同上

李申巽宋末知上猶縣忠愛廉謹深得民心歲丙子冬元兵攻上猶城巽率民死守及元參政賈復至諭降乃與居民李梓發等誓曰邑未城前遇有變民輒散而之吉贛胡泓徙邑築城正為吾民守義具也前人建城後人降城於義勿許乃堅守至七十五日城屠李梓發全家自殺申巽死之有雷晴空而震識者疑為星隕至今君子追思其事而

西江志 卷六十五  
三歎焉 林志

按安志於南安名宦有宋一朝只載十人而張齊賢孫  
沔岳飛程大昌趙希澤俱以統轄闖入則專治南安者  
守令僅五人而已因從宋史明一統志林志郡志及諸  
文集增補如右

元

張昉南安路總管始至即知閭閻疾苦奏罷不急之科作石  
堤以息水患凡有利於民者為之無遺民為立生祠 豫章書

王虎英字雄甫歷陽人大德中為南安路總管專行政教尤  
盡心於學校改勅大成殿增飭學舍今規模制度皆其遺  
跡 林志

汪澤民字叔志婺源人延祐進士授承事郎同知岳州路平  
江州事遷南安路總管府推官鎮守萬戶朶兒赤持官府  
短長郡吏王甲毆傷屬縣長官訴郡同僚畏朶兒赤託故  
不視事澤民獨捕甲繫之獄朶兒赤賂巡按御史受甲家  
人訴欲出之澤民正色與辨御史沮怍夜竟去乃卒罪王  
甲累官至禮部尚書致仕 元史

毋秘南安路總管克修其官飭修廟學時稱賢守 明一統志  
張元祚南安路總管薄賦斂省冗費嘗修平政橋以便民往  
來凡一事不獲自盡寢食不安邦人德之 同上

趙明字明之大梁人至治間上猶尹常禱雨雨至逐蝗蝗去  
驅厲厲息人以為異時營前二倉輸糧有屯軍阻撓乃躬  
自部率軍豪帖服宿弊以革民為立碑以紀其績 同上

明

于潤珪吳元年守南安當國家肇造之初宣威布澤綏懷安集凡城池廨宇學校橋梁廢墜者修舉一新

林志

周以中字道和直隸人洪武初知南康廉以律已信以示民先是民頗荒阻慢令惟以中能信服之凡有名役給片札無後期者

明一統志

吳履字德基蘭谿人李文忠鎮浙東聘為郡學正久之舉於朝授南康丞南康俗悍謂丞儒也易之居數月摘發姦伏如老獄吏則皆大驚相率斂跡履乃改崇寬大與民休息知縣周以中巡視田野為部民所詈捕之不獲怒盡繫其鄉鄰履閱獄問故立釋之乃白以中益怒曰丞慢我履曰犯公者一人耳其鄰何罪今繫者眾而捕未已急且有變

柰何以中意乃解邑有淫祠每祀有蛇出戶民指為神履縛巫責之沈神像於江為丞六年百姓愛之

明史列傳葉

高敏道安陽人永樂初以給事中左遷知上猶悉心撫字賦役均平民皆樂業

林志

趙時中歷城人永樂間守南安為政廉勤勞於撫字名聞鄰境

明一統志

齊原銘湘潭人宣德間知南康廉介有為愛民興學在任十二年士民懷之

林志

按南安府志稱原銘以民少賦重奏移繁役以蘇邑困林芊黃巖人由舉人正統中知南安府練達政務裁決如流形無濫及政暇從容詞翰卒於官民哀慕之

明一統志

郭誠通州人正統中守南安剛直勤敏興學修先賢祠及津

梁驛傳關繫民事者罔不修飭大庾有荒原高阜誠相度地勢開鑿溝渠引水溉田至今民享其利

林志

許南傑餘姚人正統中守南安剛敏端恪妖賊孫佛羅等倡亂詔籍其黨民有被誣在籍中者悉白其冤

同上

劉琮金華人正統中為南南通判多善政有膽略石溪妖民

孫志恭稱亂琮親冒矢石一鼓平之民賴以安

明一統志

徐宗傑金華人正統中橫浦遞運所大使南源山賊羅大師

寇城宗傑率民兵捕戮之奮勇先登得以成功

林志

汪惠達常山人正統中為南安經歷時大庾縣有失額糧一

千七百三十餘石民苦賠納奏豁除之

同上

張弼字汝弼華亭人成化進士授兵部主事進員外郎遷南安知府地當兩廣衝姦人聚山谷為惡悉捕滅之毀淫祠

百數十區建為社學謝病歸士民為立祠

明史列傳藁

夏璣字德乾蘇州人成化初知大庾縣寬廉愛民府學及道

源書院皆其修葺祭器舊用陶以青金易之

府志

毛智仁和人弘治中知南康廉慎有為權貴度關射利貨殖者不容匿稅贈遺雖微物不納遷改縣治竭力區措民力不擾入覲辭官而去

林志

鄧應仁字子榮南海人弘治末知南安府廉靜平恕門無私謁在任數年惟攜一童自隨去後民思之有肖像於家者

同上

黃璋順德人由舉人正德間知南康廉介自持剛毅有執立旌善懲惡二牌於要地善惡直書其名眾皆服其公

同上

按南安府志云丙子峯賊謝志珊逼城七日璋率民固



守措畫有方城賴以全

趙鶴字叔鳴江都人歷郎中以忤劉瑾左遷南安同知時峒寇犯境率兵迎敵寇掩至昇到營鶴危坐曉以大義賊曰若多如趙東街吾輩豈至此乎翼送歸郡

安志

虞鈺字剛夫義烏人正德間任上猶教諭時輦賊負險士多廢學鈺善易親授生徒講習不倦以老乞休諸生追送至虔猶不忍別其子文詡字廷曾由舉人守南安亦有惠政人為立碑以頌之

府志

洪聰字謀甫晉江人正德末知南安府以地僻民寡不及他郡一縣凡上供之費力請減損民甚德之

同上

鄭衷龍溪人嘉靖間知南康清儉豈弟凡關民生及學校事咸誠心為之立社學開便民門起敬一亭築學前逆水砂

及填學後低陷地士風大振

同上

谷同字用中南陵人嘉靖十五年知上猶縣清介自持以培善抑強為已任豪民捍法者悉嚴治之洪水衝決西城數十丈同捐贖鍰募工修築未嘗擾民

上猶志

周鏜邳州人嘉靖進士三十九年知南安府性彊毅兼善騎射廣東流寇至自率家衆十數人在橫浦橋邀擊之發一矢中挈旗者再發再中寇懼阻遂由東山麓馮河走南康郡城得全

府志

劉鑰號東臯四川人嘉靖三十五年任崇義縣簡催科捐俸

葺官倉大修學宮有碑記

崇義志

支體義全州人由舉人嘉靖四十二年知大庾縣先是流寇兩至邑體義請發公帑築水南新田鳳凰山九所等城共

西江志 卷六十五  
六座規畫周詳民恃保障 安志

按南安府志支體義作文體義

余世儒字汝為婺源人隆慶二年知南康時初行條鞭法人情觀望世儒獨盡力蠲革一切無名之征為嶺北諸邑倡

府志

吳江字元濯宿松人萬曆七年任崇義縣開狗脚嶺路建朝

天關修學宮御史陳炯記之 崇義志

葉明元字可鳴同安人萬曆十一年知南安府先是天順間

大庾學併郡學中道源書院亦裁廢明元入覲具疏奏復

庾學及書院詔下撫按竟如其請 府志

劉宦成衡陽人萬曆十年知大庾縣徵收額賦分起存二款起運則徵銀存留給發則令募人兌支銀穀布縷隨便民

甚德之庾縣學新復一切堂齋勑建俱極詳妥 同上

趙日崇字巨甫晉江人萬曆十八年知南康廉明惠愛甚有

才畧立社倉裁鹽餉置學田在任五載吏畏民懷 同上

汪承爵字仲修歙縣人由進士萬曆二十三年知南康縣操

守嚴重葺學舍闢旭山書院率諸生課藝其中 同上

林際春號懸釜泉州人萬曆間由舉人知崇義縣修公署葺

城垣建尊經閣置朱子祠祀田重建王文成祠葺崇義邑

志其錄本皆手書蓋際春工文章尤精書法云 崇義志

陳瑾號白岳宣化人天啓壬戌以舉人知南康廉能明允斷

獄如神新文昌塔築西流堤一切無名之徵及健訟猾蠹

皆力除之在任七載陞海防同知 府志

龍文光字煥斗廣西人由進士天啓四年知上猶縣剔姦格

西江志 卷六十五  
頑境內寧謐嘗建鳳閣立觀瀾社所著社約猶士迄今佩  
之調繁新建同上

宋本忠山陰人崇禎甲申任南康典史時闖賊猖獗四方擄  
掠逼城城幾陷本忠晝夜巡防賴以固圉後竟殉難士民  
哀之同上

國朝

鄭思魯號明宇遼東人順治壬辰知南康縣邑當殘破後如  
丈田徵賦招攜勸墾儘費拮据更建文廟新譙樓修舉廢

墜民咸德之南康志

梁爾壽字山公涇陽人康熙十七年知崇義縣兵氛初息室  
廬丘墟爾壽多方招徠貸贛州漕米及買六畜之屬民之  
歸集者予以牛種牲畜又捐勸學宮民至今感之劉凝崇

義志彙

白啓明字見宸遼東人由舉人任廣東清遠知縣康熙十五  
年舉首逆書導引大兵出粵奉

旨嘉獎擢南安知府值平定之初流民失所招徠開闢協濟軍  
需境無騷擾建奎星閣以興文教飭保甲弭盜賊三十三  
年擢贛南道捐修濂溪書院巡撫宋犖記其事歲歉設法  
賑濟饑民全活者無算南安崇祀冊

馬化龍字雲津遼東人康熙二十年知南安府事革火耗除  
科派倡修文廟開設義館政聲大著同上

張為煥字允文太倉人明庶常溥之族孫庚戌進士授雲南  
某縣補任崇義甲寅乙卯間兵燹交連楚粵盤踞峒穴者  
猶未盡戢為煥至歎曰去萬里外之洱海而來蒲伏此箐

嶂其命也夫雖然要有前槩在購文成公橫水方略條件  
倣行之表險害置土兵編閭伍嚴保甲風俗稍馴興義學  
勤課試重葺王文成祠尋以老乞歸

同上

靳襄字天垣鑲黃旗人由例監累陞南安知府作興學校重  
建周程陽明書院革除陋規禁加派葺城垣遇旱虔禱設  
法賑濟士民懷之

同上

陳奕禧字香泉海寧人康熙四十七年由戶部郎出知南安  
府倡修學宮詳除板運減免陋規纂修郡志工書法人爭  
寶焉

同上

贛州府

宋

王韶之字叔泰河東人宋武帝孝建中為南康相歷官左民

尚書光祿大夫在國時嘗謨南康記元嘉九年豫州刺史  
長沙王義欣上言所統官屬清節績能韶之與焉奉詔褒  
美

宋書

陳

宗元饒南郡江陵人性公平善持法諳曉故事明練治體吏  
有犯法政不便時及於名教不足者隨事糾正高祖大建  
間遷南康內史以秩米三千餘斛助人租課存問高年拯  
救乏絕百姓甚賴焉以課最入朝加散騎常侍終吏部尚  
書

南史

唐

許圜師安陸人擢進士第龍朔中為左相免官久之為虔州  
刺史專以寬治州人刻石頌美部有受賕者圜師不忍按

但賜清白箴其人愧自修飾更爲廉士進戶部尚書卒謚  
曰簡

唐書

張九臯曲江人九齡仲弟孝廉登科嶺南按察尚書裴佖先  
表授海豐司戶及佖先討五溪蠻奏授贛縣令軍興倚辦  
供億無留宣慰使梁勛竹承構先後奏其戶口增益清白  
有名褒進朝散大夫尋改授南康別駕以便省覲累遷殿  
中丞尚書職方郎中

府志

按唐書張九齡傳弟九臯亦有名終嶺南節度使而不  
立傳且在嶺南時常供楊妃織繡之工多至七百人以  
所獻精靡加三品頗爲時議所疵

裴諝字士明聞喜人禮部尚書寬之子大曆間出爲虔州刺  
史歲旱諝禱於儲潭之神翼日大雨從弟曙撰祈雨感應

頌宗人弘書之碑存廟中

同上

路應字從衆京兆三原人以父嗣恭蔭爲著作郎貞元初出  
爲虔州刺史鑿贛石梗險以通舟道終左散騎常侍

唐書

按林志云應奏割雩都地置安遠縣陶甓以完城逢水  
旱賤出穀俟歲熟收之常有贏利人不病饑而官府有  
蓄積

張署河間人德宗時以進士舉博學宏詞累遷虔州刺史民  
俗朋黨殺牛又多捕鳥雀魚鱉相買賣期放生爲福署一  
切禁絕使通經吏與諸生之旁大郡學鄉飲喪婚禮張施  
講說民吏觀聽從化度支符下折民戶租歲徵綿六千屯  
比部承命惶怖署獨疏言嶺民不識蠶桑難以供辦月餘  
免符下民相扶攜守州門噉謹爲謝改澧州刺史終河南

令見昌黎集墓志府志

馬總字會元系出扶風元和中為虔州刺史廉清不撓用儒術教其俗政事嘉美歷官太平軍節度使入為戶部尚書

唐書

王揆字孔度黃岡人泰和六年令虔化築子城濬濠池建廨

舍創始之功居多林志

五代

周章字仁績縣志作章仁績顯德間知寧都縣增葺子城為防禦計

林志

宋

楊澈字晏如建陽人建隆初進士江南平通判虔州令就大將曹彬分兵以行既入境偽帥郭再興擁兵自固澈單騎

直趨其壘諭以朝廷威信再興即奉符以代澈悉料城中軍士之勇壯者凡五百人為一綱部送京師土豪黎羅二姓聚眾依山謀亂澈率兵平之械送闕下遷右贊善大夫

豫章書

王協太平興國間知虔州奏析新縣地置興國縣林志

陳從易字簡夫泉州晉江人進士及第知虔州會歲大饑有持杖盜取民穀者請一切減死論凡生者千餘人入為左司郎中知制誥宋史

張式字景則建州建安人天禧進士景祐間知虔州虔於東南州為最劇式鎮撫之以無事三司市綢絹十餘萬非經數式拒弗市民以守為有賜也式廉靜好書長於政事見時事有不便往往能極言之無所忌所居官既去而人見

思仕至尚書祠部郎中 臨川集

陳希亮字公弼眉州人天聖八年進士知雩都有老吏曾腆舞法粥獄以希亮年少易之希亮廉得其重罪腆叩頭出血願自新希亮戒而捨之暨修學牘捐家財助官遣子入學卒為善人巫覲歲斂民財祭鬼謂之春齋否則有火災民譌言有緋衣三老人行火希亮禁之民不敢犯火亦不作毀淫祠數百區勒巫為農者七十餘家交代去父老送之出境泣拜曰君去恐緋衣老人復出矣 東坡集傳

程戡字勝之陽翟人進士仁宗時通判虔州州人有殺母暮夜置尸他人門以誣仇者獄已具戡獨辨之正其罪歷官參知政事 豫章書

趙抃字閱道西安人進士嘉祐間知虔州召戒諸縣令使人

自為治令皆喜爭盡力獄屢空改修鹽法疏決贛石民賴其利造舟百艘以給二廣諸郡仕宦沒而不能歸者 明一

統志

沈希顏字幾聖明州人嘉祐八年知雩都縣公宇有妖禽夜啼甚哀希顏題詩於所棲樹遲明禽飛去縣西峽路崎嶇鳩工開鑿遂為坦途 府志

孔宗翰字周翰道輔之子登進士第知仙源縣為治有條理王珪司馬光皆上章論薦知虔州城濱章貢兩江歲為水齧宗翰伐石為址治鐵錮之由是屹然詔書褒美歷陝揚洪兗州皆以治聞 宋史

孫復字明復平陽人石介之師范仲淹富弼薦復有經術除國子監直講慶曆七年徐州狂人孔直温謀叛捕索其家

得所遺復詩坐貶監虔州商稅嘗作贛縣孔子廟碑翰林  
學士趙槩等言復行為世法經為人師不宜佐州縣乃復  
為國子監直講府志

劉彞字執中福建懷安人幼介特嘗師胡瑗擢進士熙寧中  
以運判知虔州虔俗尚巫鬼彞斥淫巫三千七百家使以  
醫易業習俗遂變時饑民多棄子立法收養日給官米二  
升月一驗視一境無天闕時有甘露瑞蓮瑞粟之應城東  
北瀕江彞作水窗視水消長而啓閉之水患遂息元祐初

召為都水丞

豫章書

錢顛字安道無錫人初為寧海軍節度推官知贛縣事以治  
行聞治平末以金部員外郎為殿中侍御史裏行蘇軾贈  
詩有烏府先生鐵作肝之句因號鐵肝御史宋史

楊時字中立將樂人熙寧九年中進士第師事河南程顛學  
者稱龜山先生任虔州司法州有疑獄衆所不能決者立  
斷之累官龍圖閣直學士卒謚文靖林志

王昉字景和崇安人皇祐進士熙寧中以著作郎知雩都民  
素囂訟昉圖古人之孝義者列其事勸誘之逾年訟息縣  
南有泉灌田千頃忽產鉛錫使者欲置官治昉力爭遂寢  
其議改朝奉郎判婺州府志

謝麟字應之甌寧人嘉祐進士元祐間知會昌有民被酒夜  
與仇鬪既歸為親屬所殺其家誣仇者獄久不決麟知死  
者無子所親利其財故殺之訊鞫輒得真情邑稱神明同

蔡懋字子堅仙游人襄之曾孫靖康中為會昌尉遇賊犯境



領所部及土兵禦之力戰遇害贈承事郎官其子同上

魏懋字覺民甌寧人由進士紹興初知雩都事江西盜起虔

諸邑多失守懋出帑金犒勵誓與死守寇攻城累日不能

克遁去岳飛提兵過雩見井邑俱無殘毀甚稱賞之豫章

書

李畊先為忠州團練使紹興二十二年禁兵齊述殺統制吳

進同統領馬晟據贛州畊奉詔致討兼知州事屢下金字

符許從招撫畊遣辨士諭以禍福令出降不聽乃大修攻

具刊木輦石破其城盡收賊黨誅之捷聞轉觀察使畊披

灰燼瓦礫立治所為叢冢收葬死於兵刃者同上

劉藻字廷潔南雄人紹興間知雩都設事布置悉有程度首

興學校修築城池勸民畊織刊布前令王鬲所作孝義圖

舊本使民誦習邑民化之秩滿去民為立祠府志

陳剛中字彥柔閩清人任太府寺丞紹興中胡銓上封事乞

斬秦檜謫廣州剛中送之貶知安遠時與張九成等七人

同謫故詩曰同日七人俱去國何時萬里許還家竟卒於

官豫章書

李寰字畿卿郴州人紹興間知寧都利弊無不興除梅江水

漲涉者易溺寰作橋以濟民爭趨役將代猶夙夜董勸畢

役而後行父老感其德為立祠廬陵楊萬里為之記府志

趙汝回大梁人紹興間任會昌州時閩廣寇起民庶竄徙邑

里蕭然汝回募義勇以備戰守築城池以為保障招流逋

以實村落寇知有備竟不敢犯民賴以安林志

趙善繼紹興二十四年知贛州以興學宣化為首務先是府

學罹於火至是重建張九成記之居常勸民為善頑梗者必繩以法踰年風俗稍變訟牒希簡百姓愛戴之

府志

薛弼字直老温州永嘉人政和進士紹興二十五年以左司郎官知贛州武夫周虎臣陳敏者善戰丁壯各數百視官軍可一當十弼善待之後福州大盜有號管天下伍里龍滿山紅之屬眾甚盛詔升弼集英殿修撰往知其州弼乃奏虎臣為副將敏為巡檢選兵壯千人號奇兵日給糗糧責以滅賊凡四年而賊平擢敷文閣待制

宋史

段秀實隆興間知龍南縣事以縣治毀於寇嘆曰百里之地惟民具瞻積歲不理令之恥也爰率民肇築土城凡廳堂庫舍輪奐一新

林志

趙公偁宗室紹興中任贛州隆興二年收有寬剩錢十餘萬

請為民代輸夏稅

府志

羅願字端良新安人以父吏部尚書汝楫蔭補新城縣監稅乾道二年擢進士第八年通判贛州攝守事以簡易為治贛人化之部使列其治行以聞從臣又交薦其才歷知鄂州卒有鄂州集

府志

莊夏字子禮泉州人淳熙進士慶元六年入旱詔求言夏時知贛州興國縣上封事曰君者陽也臣者君之陰也今威福下移此陰勝也積陰之極陽氣散亂而不收其弊為火災為旱蝗願陛下體陽剛之德使後宮戚里內省黃門思不出位此抑陰助陽之術也召為太學博士累官兵部侍郎煥章閣待制與祠歸

宋史

按贛州府志朱夢龍生祠記永豐民孫六毆妻妻自剄

死六懼夜昇屍興國田中宣言盜自興國掠殺夏密令人視六家則土屋繩樞死者則蓬頭禿項也乃面詰六曰盜何利而劫掠及汝乎六語塞自是民不敢欺嘗却添給錢九十餘萬為下戶代輸逋欠五十三萬餘則以給公家之役民感德繪像祠於學宮

趙善佐字佐卿宗室居邵武受學於張敬夫又從朱元晦遊淳熙中知贛州奉法愛民以勤儉自約飭不妄費公帑干請無所應在任踰年卒民哀思之

府志

王柟字木叔温州永嘉人乾道進士知贛州先禮教後刑罰先是元祐黨禁贛士與者十四人柟舉以諭其耆老曰汝州多正人如此將百世稱之後生可不勉乎哉民皆興起遷善遠罪或夜不閉戶俗工麻苧鮮絲績柟課種桑多者

減役贖罪贛廣間販鹽號鹽子所過輒殺傷官軍故有鹽子獄柟申嚴保伍須行者給憑乃聽由是十省八九提刑者意不合毀之於朝罷主冲佑觀士民雪涕前後擁不得行柟曰太守數易古矣今不去後當去耳賦詩留別贛人刊而祠之

葉水心集

沈木崇德人嘉定進士知石城縣時汀寇入境巡司以同姓者指為賊木察其非是破械與約使捕熊子開等以自白已而果縛以獻人服其明

府志

萬億嘉定間知信豐縣事舊無城池億庀工傭役百雉屹然先是有讖云上門驅山下門塞海若要成城除是萬載至是乃驗

林志

鄒應龍字景初泰寧人慶元進士開禧初忤韓侂胄出知贛

州建慈幼院牧養民間所棄子女寒暑有衣疾病有藥襁褓盈櫛各有司存所賴全活甚眾終資政殿學士 府志

陳孔碩候官人嘉定間知贛州事摧強植弱子惠黎元先是豪家沿江障水作碓以射利水湍急奔射舟行多覆孔碩盡去之前患乃息子鞞紹定間復知贛州進江西安撫使 同上

魏泌字深甫常山郡人嘉定九年知寧都奉捐俸七十萬緡購田八十畝以贍學躬勤課校於時登賢書者十有二人又建梅江石梁二百餘丈民不告勞 同上

司馬蓮字及之文正公光裔孫慶元三年知贛縣事時學舍久圯不治蓮慨然以修建為己任舊廩歲輸二百斛緡錢僅以百計蓮括六鄉閑田之所入益錢至三倍請於州選

補生員寢食於學月書季考以督厲之文風郁然 周必大學記

葉湜字子是建安人少遊朱文公之門以父任得邵州新化簿改尉寧都有劇賊數十人深入廣右為號已易服遁歸廉得其根盡傳之法後以宣義郎知贛縣一以所得於師者施之政督吏胥不少假借而以家人父子遇其士民兩造至庭一見即決無所宿滯邑有田訟更數令不能辯枉直湜一見詰問具得其情縣人稱神明 真西山集

林光裔福州人嘉定十二年知寧都周知民隱舉行荒政邑俗多溺女光裔儲米為舉子倉積俸為舉子錢貧民生女者鄰里以聞先給錢米養產母閱月抱女至庭驗視則月給米三斗至周歲而止行之數年全活甚眾 府志

高照邵武人以進士任贛州司理參軍有盜驅脅良民利賞者捕之將論死照察其枉出繫者百餘人同上

楊珏字君寶紹定進士淳祐元年調贛州教授先是學計蠹於前官廩餼不給珏捐私橐以助後改通直郎知饒州官

至朝議大夫同上

趙紉夫福州人紹定四年以贛尉攝寧都縣時石城寇黃元仲僭號狂逞紉夫葺城濠為守禦計賊圍城登臺射之稍

退率兵追北遂禽元仲齎於市明年還職父老磨石紀其功尋知本縣在任能聲益著同上

劉弁字清叔寧化人端平進士歷會昌尉知瑞金事築城建學以平洞寇功改京秩終奉議郎同上

趙時儋紉夫從子景定中知寧都事先是磔下賊廖四猖獗

勢將逼城時儋在道聞警單騎疾馳至邑選募義丁禦賊勸諭富民出資以給兵食與賊戰大敗之斬其渠首縱火焚賊砦殆盡府志

吳柔勝字勝之溧水人舉進士第授嘉興教諭御史湯碩劾其主朱熹之學不可為人師改贛縣尉韓侂胄用事黨禁甚厲柔勝獨講學不輟人以此服之時謫宦嶺南者多歿於瘴還過贛妻孥率流落可憫柔勝置廣惠館括閑田所入待之提點刑獄司辟為屬獲盜當改官柔勝曰豈忍以人命博一官丐祠歸府志

元

陳泰字志同茶陵人延祐進士尹龍南修學校賑恤貧窮境內乂安時信豐洞賊臨境泰率兵與戰於犁鼻山敗績死

之士民悼痛收葬馬鞍山之原立祠祀之

府志

達實蒙古人泰定中贛州路總管攝寧都縣事時羣醜嘯聚境內獨安田覈未精賦浮於額遂稽實奏免虛糧五百餘石斷獄得情徭役稱力民多悅服為立碑紀之

林志

古魯篤丁蒙古人至正中為贛州路達魯花赤廉知郡中豪右武斷因獄為市者悉裁以法不數月令行禁止因嘆曰吾民幸知向背不進之以禮未善也於是飭學舍延師儒闡明教化俗亦少變見輟畊錄

府志

按輟畊錄載古魯篤丁字志道守贛州路任滿聽除時有故吏丘往臨江貼補介篤尺牘見總管木八刺木既錄用就遣丘持俸鈔五十錠餽篤蓋篤以廉故家甚貧朋友間每分財以濟之丘竟匿其鈔後木數得篤書而

謝不及此疑焉便使問之篤知為丘匿具書請失謝之罪丘聞惶報奉鈔還篤終不受且隱其惡未嘗與人言

哈海赤至正十六年繼全普庵撤里守贛長於弓馬力能射虎偽兵至死守食盡或請降哈海赤曰我奉命守土何敢負國爾父老完首領保妻子宜也我固自有處及被執見偽兵大罵曰與爾戰者我也速殺我無殺我百姓遂遇害

陳海桑集

王榮忠岳州人至正間贛州判官時盜擾寧都掠興國陷會昌榮忠與賊戰於萬石俘馘三百有奇克復各縣駐劄雩都相形勢以建城募義勇以禦賊賊復集五千餘人攻雩都榮忠身先士卒列城分守矢石交下賊死幾半命子收公私銅鐵鎔液澆注賊由是潰追擊又大破之雩民羅拜

曰再生我者公也 豫章書

朱克敬至正末任興國尹邑常賦七千屯田襍賦不與焉自楊吳南唐割據歲倍取之民不堪命克敬上其事於府率吏民泣訴當道憫其誠與之申請未幾命下民額手相賀泰和陳謨作申免倍徵序以頌其德 潞水志林

明

鄒奕字弘道吳江人元至正中進士明初任御史出知贛州時天下初定郡縣規制一切草創奕至建社稷壇於西津門風雲雷雨山川壇於鎮南門置厲壇於府城北又建遞運所館驛陰陽醫學百廢具興坐事謫甘肅永樂初以蹇

義薦名還 府志

崔天錫字彥才贊皇人由賢良舉歷官有聲明初取贛州即

以天錫知贛縣草昧之際事多創造重建縣治及明倫堂濂溪書院造浮梁以濟章貢二水先是至正戊戌邑罹僞漢兵火版籍燬棄靡遺公私交病天錫多方訪求令民具實自呈及互相參覈既有次第復按行封畛度田廣狹肥瘠率三十而取一糧覈役均人民稱便在任九年陞廣州知府 同上

查允中休寧人洪武間知雩都縣時流賊犯境征南將軍帥師討之應給軍需民不告擾及賊平撫綏黎庶奏蠲糧額至今民思慕之 林志

黃六八寧化人洪武間知會昌縣事時有草寇剽劫六八請兵護守勦捕而饋餉不絕人多才之又奏除賦稅以安民立軍鎮以衛民遂為定制 同上

陳九思浙江人洪武間龍南教諭奏免贛郡秋糧三千有奇  
民困以蘇百姓立祠祀之 同上

莊濟翁泉州人洪武間知寧都縣事勸農興學雖閭巷小學  
師生亦令朔望赴邑庠聽講遠近聞風而化懲豪猾修陂  
塘造梅川橋人懷其惠 明一統志

李子昭博野人洪武中以人材舉為信豐丞自廣寇標掠之  
後民竄田荒子昭奏蠲稅額十之八又請立戍屯田為守  
禦備自是流亡復業而防衛亦有攸賴云 信豐志

唐子儀名文鳳以字行歙縣人洪武中以文學徵授興國知  
縣教民力本務農嘗出郊躬勸勞之造士日有程課寒暑  
不輟擢趙王府紀善 潁水志林

陳大本無為州人洪武中任贛州同知撫民以寬臨吏以莊

應務以敏尋陞本府知府吏民熟其政雖公務煩劇凡所  
號令不勞而集遷浙江參政 明一統志

戈文七金壇人洪武間知龍南縣事值廣寇兵火之後百務  
廢墜文七奏減糧稅省冗官招撫流竄勸課農桑歷任三  
年民懷其德 林志

朱伯齡金華人洪武間任寧都縣主簿政多惠愛時寇剽掠  
之餘徵賦如舊伯齡為覈荒蕪奏免租稅民甚德之 同上

楊霄遠洪武間任安遠典史時民寡役煩霄遠考績時奏減  
賦稅民始樂生為立祠以祀 同上

按安志作楊霄漢

許庸廣東石城人永樂初知會昌縣莅政公勤庭無留滯遇  
工作貧者驗丁以出力富者量財以供費民樂趨事在任



八年修學舍勵生徒積年逃逋皆聞風歸籍以艱去民思慕之

明一統志

李素字宗文蒼梧人永樂進士宣德元年知贛縣修廢舉墜驅蠹釐姦得良牧體邑之建春門東津渡西津門知政橋儒學殿堂齋廡皆其勅修歲荒勸富民出粟以賑秩滿報留踰十五年進俸正六品

府志

黃恭松江人由鄉舉正統中知贛州府精敏有才盡心民事尤惓惓學政去後民有餘思

同上

陳璉興化人由鄉貢正統初知興國縣清勤不懈多惠政築長信里堰塘母喪去民走訴上僚挽留之得請於朝服闋再任三載

同上

鄭暹仁和人由舉人正統初任贛州通判莅事有聲戊辰盜

起躬率民壯保障郡幸無虞當道以聞陞知府去

同上

王學古交阯人正統間知信豐縣事廉介寬厚嘗招徠蠻洞列為編戶里甲以增巡撫侍郎楊寧奏其功陞授六品致仕後家於信豐

林志

唐瑜辰溪人由舉人正統九年知龍南縣自洪武末裁并學校以生員隸之郡庠費舍遂廢瑜疏請復之

府志

周昂字時舉曲江人正統丙寅知寧都持廉秉公勸農興學戊辰閩寇鄧茂七倡亂連破石城瑞金二縣昂豫為武備伺寇至即督率勇壯與賊戰於東龍屢有擒獲已又敗之於上蔡又敗之於白玉賊遁去論功陞本府通判

同上

黃振沙縣人正統間知安遠縣慈祥愷悌喜怒不形在任九年人咸戴之

林志

阮衍交阯人正統間知瑞金時流賊之後官兵繼擾衍立法防制兵不敢犯撫瘡痍招流亡民懷其惠同上

楊友諒雲南廣通人成化間知龍南縣事性素忠實政務老

成民咸樂之會司府檄田升科友諒仗義執言力為分辯

得豁秩滿民遮道攀戀留一鞞而去林志

顧暉字明德長洲人正統進士改庶吉士天順末謫知贛州

長河峒氓獷悍時出剽掠縣匿不以聞暉疏言用兵事宜

迄平之賜以金綺暉有治才遇事裁決無難易無不立辦

豪猾斂手吏不敢欺分省人物傳

張勝麻城人天順六年任雩都典史長河峒賊竊發勝率民

夫陳世用等禦之賊圍急援兵不至皆死於陣雩都志

姜璉蘭溪人天順進士成化七年以海寧州守遷知贛州繕

城池實倉廩防賊寇改建郡縣學治行為江右第一林志

李璉字純夫懷寧人由進士成化間知贛州府興學校修城

池建府治郡民罹大水疫疾大作璉賑濟全活甚眾闔廣

流賊犯境率民兵敗之既而復肆猖獗璉躬冒矢石卒平

賊士民至今感之豫章書

王廷珪湖廣人由舉人成化間任贛州同知甲辰流賊犯境

統率民快乘銳倍道進與寇相逼援兵不至竟死於賊事

聞誥贈官秩錄其子同上

項德輝建城人由鄉貢成化十四年知龍南縣舊例秋糧轉

運於郡暨會昌興國等縣灘高石險時有漂損領運者苦

之德輝疏請改折民困大蘇府志

達泰麗水人由鄉舉成化間知興國剛介廉慎時流寇肆毒

鄰封適靈雨城壞民甚恐泰併力修葺寇不敢犯卒於官  
民立祠祀之 同上

梁潛字孔昭由鄉舉成化十六年知會昌居官廉勤修敝舉  
廢加意學校農桑長河峒素稱頑梗潛至聽其教令編戶  
日增邑治改觀 同上

章廷圭字文瑞石埭人由鄉舉成化八年知興國以興學勸  
農為首務寇躡鄰封且及境廷圭選丁莊教以武略寇不  
敢犯有甲乙相構而甲病死者昇屍以誣乙瘞之於庭遂  
為厲乙家暴死者三人廷圭得誣狀治甲罪而厲息邑有  
牛牯陂澮高不能通水廷圭相度上流鑿石引水自蘇陂  
至竹壩延袤二十里歲增穀數千石遷倅衡州補贛州南  
村峒寇李福正剽掠殺人出沒汀邵間廷圭相機擒之四

封晏然

同上

張璫字孔圭浦城人成化庚子鄉舉授贛州推官時汀韶寇  
侵贛境重以饑疫璫持檄走諸邑增治城濠勞來周恤民  
賴以安治獄多所平反弘治間秩滿陞本府同知 同上

聞韶羅田人由鄉舉成化二十一年知石城縣才識通明幹  
辦敏給防禦廣寇兵食恒足開拓城池至今賴之 同上

黃世忠字孝卿長樂人由鄉舉弘治初知贛縣持性堅定敷  
政平易贛俗信巫世忠毀淫祠百餘民咸感化 林志

甘文紹桂平人由鄉舉弘治二年知安遠邑故土城陶甕改  
築廣積貯以備儉歲新文廟以振士風當流寇後勅建一

新陞瑞州通判

府志

朱諫字君佐樂清人弘治進士正德癸酉知贛州有賊棲大

西江志 卷六十五  
三  
帽山山延袤閩廣千餘里中多谿谷賊憑要害時出爲民  
患諫舉兵壓賊境歷行盤龍嶺諸寨下令曰能捕賊者即  
以所得賊貨充賞人懷利競赴旬日殲渠魁俘數千人餘  
衆悉降乃散置於安遠龍南諸所給之牛糧遂盡爲良民  
移知吉安謝事歸 分省人物傳

蔣曙字景明全州人弘治進士知贛縣節愛寬仁先是郡中  
職清戎者歲計三分以爲政績故絕軍已歷百餘年者往  
往械繫戶丁遣送戍所曙至核實分辨請於清戎直指除  
豁甚衆顧猶有漏者越二十年曙遷江西右轄總清軍事  
於是力請於直指朱袞爲之覆疏曙入覲又請於大司馬  
絕軍之續補者俱得如奏名數盡除其籍民獲更生至今  
受其賜 府志

萬琛字廷獻宣城人由鄉舉初選清江令弘治甲子補瑞金  
居數月廣賊乘元日夜殺門卒攻城突入琛從兵壯數十  
人迎敵相持經日力屈遇害時弘治乙丑二日也守臣上  
狀詔贈光祿少卿賜祭葬蔭一子 同上

蔡夔南寧衛人由鄉舉弘治十八年知寧都有惠政正德七  
年補安遠時何積玉將據城以叛夔焦勞備禦密集忠勇  
畫計擒積玉餘黨解散地方獲安 同上

王天與字性之興寧人正德進士知寧都廉平有政績丙子  
從督府王守仁征橫水泃頭桶岡龍川諸寨有功陞俸二  
級已卯從討宸濠冒暑疾作卒於軍守仁哭之哀解衣爲  
殮明年錄平逆功優恤其家邑人肖像祀之 豫章書

邢珣字子用當塗人弘治進士正德初歷官南京戶部郎中

忤劉瑾除名瑾誅起南京工部遷贛州知府招降劇盜滿總等授廬給田撫之甚厚後討他盜多藉其力巡撫王守仁征橫水桶岡珣常為軍鋒功最增二秩宸濠反以重賞誘總總執其使送珣遂從珣共平宸濠珣遷江西右參政世宗錄功增秩二等

明史列傳葉

黃泗福清人正德中由鄉舉知興國先是劇賊鍾仕錦何積玉騷動江廣間支黨掠興國泗至值焚蕩之餘民日夜相驚恐寇且至乃募壯丁守城沿城置警舖二十四以處之建樓城上重構文廟齋廡而按追田塘之侵蝕者以贍學毀諸淫祠改建三程祠移安湖書院於學宮時王守仁方撫虔唐龍視學江西俱極嘉獎之

府志

祝詠字鳴盛衡陽人嘉靖進士歷戶兵兩科以方鯁忤時外

調贛州知府減郡供應嘗持法於督撫憲司無所撓境多盜憲司令賞捕盜者詠訶其賅不實乃屏人謂曰吾知某非盜柰何枉之瞋目視捕者不能置對具吐實立反其獄憲司不勝忿與巡撫共擠詠詠再引疾去上不聽尋陞按察副使終陝西左參政

分省人物考

王鈇字公儀候官人嘉靖進士以南戶部主事左遷瑞金令廉明強幹政教兼舉勸鄉校聘名儒為羣士師置田以供課藝費文教聿興鄰寇竊發鈇多方備禦時出偏師以挫其鋒賊不敢犯遷東平知州

府志

趙勳字彞伯番禺人由鄉舉嘉靖間知瑞金均徭役興學校修邑志建雲龍橋委賑龍南信豐存活甚眾安遠黃鄉賊葉金糾眾剽掠勳奉督撫檄往諭單騎入賊所推誠慰撫

西江志 卷六十五  
縛倡亂者以獻一方晏然擢授御史

同上

王春復字學牧晉江人嘉靖進士先令泰和有惠政比守贛益簡靖不擾時有大木之役條上便宜視諸府費為省流寇覘知督木者有積貲從石城越會昌將薄雲都都督府遣二材官偵賊為所執遠近洶洶春復提兵出結營四十里外奪以先聲賊聞氣沮釋二弁遁去累官貴州按察使

同上

潘翊錢塘人舉人嘉靖庚戌令寧都才識敏練優於治劇縣無驛遞過客夫馬責之民間翊首立官船官馬今為定例有罹於法者託吏覬金翊嚴拒置於法陞沅州知州

同上

盧守字忠獻南海人嘉靖甲辰進士丁未知興國縣設匭於門務求已過察民隱縣有虛糧千六百石民苦賠累多逃竄守履畝清丈正經界平等則民力稍紓當道有難決事必諮焉遷潼川州守

豫章書

雷上儒字應聘嘉魚人嘉靖進士歷郎署壬戌知贛州當辛酉之亂賊氛方揚徵發旁午上儒從容應之未嘗詘乏督府志在滅賊慮州人之為賊耳目也設匭轅門以來告密時贛民黎氏劉氏趙氏先世有田土於龍南適鄰賊巢仇家遂舉其名指為通賊逮捕下獄將戮之以徇上儒請即訊不可請頌繫緩決不可明日且出旗牌縛以赴法上儒趨入反覆陳說泣數行下督撫為之感動良久起謝曰君誠篤君子也豈欺我哉遂釋之今各姓子孫立木主祀之

安志

黃辰字文斷大埔人嘉靖進士乙丑由部郎守贛練識長才

西江志 卷六十五  
察姦摘隱吏民畏服革沿門火夫雜役修復書院議建定南縣治歷遷福建副使 府志

吳誠字明卿瓊山人正德己卯舉於鄉嘉靖乙未為龍南令釐夙弊四十餘條治聲赫然沙頭賊徐守沐僭號倡亂官司不能制謝鉞李鑑者王文成勦三泖時用之以撫輯阮洞頑噐者積久多斃法誠廉得其狀召至出軍門檄示之曰將逮戮汝皆叩首請命誠曰能擒沙頭自効者貫罪鉞鑑敬諾即誘守沐擒捕之境內晏然所著有雁峰詩集 同上

趙承謙字德光常熟人嘉靖進士任贛州推官贛俗噐其豪仰刀筆而食以間把持富人長短稍不給輒文致其罪而黨更迭為証佐承謙至廉得其狀杖而出諸境一郡稱快

攝贛縣尉為龍南盜劫去欲挾以攻縣承謙從兩吏單車逼盜壘陳說利害盜叩頭請死送尉出又攝寧都當賑而御史行部至贛承謙曰吾不忍以饑民易御史權也畢賑而往司理三年以強項故僅擢南京選司後歷官至參議 弇州史料

林萬潮字養晦莆田人嘉靖進士丙午補贛州推官謙冲周慎斷獄務求其生攝興國重建安湖書院聚諸生課業其中信豐大水奉檄往賑冒暑行村塢中計口給授凡活數千人竟以痢卒官 府志

李鳳朝貴州人嘉靖戊午由歲貢任信豐主簿時三巢賊賴清規等屢掠城下鳳朝督兵出戰屢破賊歲癸亥二月賊入青邨谷鳳朝攻之賊距山逆戰鳳朝奮力先登為賊所

西江志 卷六十五  
害數日得其屍顏色不變邑人哀之呼其山為主簿腦信  
豐志

海瑞字汝賢瓊山人以乙榜為南平學諭進淳安令以伉直忤部使者意撫他事謫調興國值辛酉兵燹後十室九空瑞至勞來安集漸復舊業邑苦浮糧則述八事上當道懸賞捕盜捐俸修學又植松以護水口插杉以興民利飲冰茹檠一如淳安云 安志

按明史海瑞傳署南平教諭遷淳安知縣以鄢懋卿行部供具甚薄懋卿屬巡鹽御史素淳論瑞時瑞已陞嘉興通判坐謫興國州判官按興國州屬湖廣非贛州興國縣也謫州判官非縣令也今安志與贛州志皆去州判官三字采入名宦恐有附會因附錄明史以正之又

按孫承澤四朝人物志亦云興國而無州判官三字大約安志府志皆以此為據也

葉夢熊字男兆歸善人嘉靖進士由福清令入為戶部主事改御史以諫降邵陽丞累遷贛州知府平黃鄉賊遷浙江副使累官巡撫貴州尋改陝西 明史列傳葉

李多祚字可久石首人由鄉舉嘉靖壬戌知安遠時三巢構亂大石小石伯洪三保俱被脅從而腰古丹竹樓等保又皆招撫新民多祚調度有方駕馭得策每遇寇警鼓率鄉勇扞禦新民亦肯自効下歷之役獨當一面擒斬招降以千計寇平三保流移千餘家盡歸業築城南逕以據要害其功尤足垂久遠云 安志

龔有成嘉定人由鄉舉嘉靖四十二年自詔安令調龍南時



西江志 卷六十五  
三  
為賊殘破瘡痍未復有成愛養招徠境內改觀督撫奏留  
為本府同知仍管縣事比進勦高砂下歷賊壘有成協謀  
蕩平地方甚利賴之 府志

呂若愚字可明浙江新昌人嘉靖進士除長洲令隆慶三年  
調瑞金恢復書院闢宣文門增修公署橋梁祠宇時紅白  
蓮邪教煽惑愚民跡其渠魁寘於法餘皆解散終駕部郎  
中 同上

陳瀾麗水人由鄉舉嘉靖丙寅為信豐知縣清覈嚴明下歷  
之役督撫移鎮信豐兵將四集取辦倉卒瀾一身任之措  
處次第上不廢事下不損民新立定南縣督撫疏薦詔加  
五品服俸卒於官 同上

沈文淵字上甫丹徒人由鄉舉萬曆四年知長寧邑當新造  
城池學校縣署一身扞始董率勤勞已而定里均糧衡文  
作士團兵戍守諸務漸次就理考滿去卒於途百姓哀慕  
之 長寧志

崔允升字吉山海門人由舉人萬曆十一年知會昌下車即  
革冗役恤里甲凡不便於民者悉除之捐修城垣公署纂  
修邑志文詞典贍卒於官 會昌志

劉昌祚武進人由鄉貢知雩都操履清白邑俗溺風水有停  
喪數十年不舉者刻日諭之畢葬又翦除上吉鄉劇盜高  
魁一等四境寧謐陞金華通判 府志

黃克纘字紹夫晉江人由進士萬曆十七年守贛值歲大侵  
發倉以賑更因舊學之製而新之鳩工庀材而以廩中餘  
粟給役人食民皆競赴不期月迄工陞四川提學 同上

陸化淳字君復常熟人萬曆進士丙午守贛州法嚴政舉別駕某以兩橋稅羨四千金貯於府化淳固辭值病革別駕往省微言諷及則伏枕謝曰吾無事此家人復請以手麾之遂瞑士民為之巷哭

府志

沈振龍字潛起秀水人萬曆進士天啓二年守贛州聞寇適發虔撫議徵兵焚郭外民居閉城堅守振龍不可曰吾有備矣就所立里甲部伍約勒之張旗幟申斥埃寇不敢至避難者麇集軍士輒縛上幕府指之為寇振龍按其妄多所開釋忤上僚意以軼盜劾罷贛人懷之

同上

祁汝東山陰人由鄉舉萬曆甲申為贛州同知聽斷公明用法平恕獄難鞫者當道悉委之以屯田高下分等則以定運軍年限衛所至今賴之終兩淮鹽運使

同上

嚴遵試字行之賀縣人由鄉舉萬曆間為贛州同知遇事摘發推見至隱盜賊竊發禽制有方歲旱禱雨徒步暴日中東南瀕河居民苦板木牙行則為蠲其役在任四年歌謠

盈路

同上

李熠號鄴郁涉縣人萬曆間通判贛州權稅凡偵夫摻卒一切罷去務為寬疎節目或縱舍微利過者樂之後南陽李若素判郡筦權亦能恤商施惠稱二李云

同上

吳宗周字熙偉福建南安人由鄉舉知興國激滅二水自城北合流過縣南舊為浮橋以濟歲久圯宗周至捐俸訖工鄒元標為之記徵輸有法買田數十畝以資軍黃二冊解費設白沙渡民不病涉邑人思之

激水志林

蔡鍾有字恒卿同安人萬曆末由鄉舉知興國嫻於吏職能

得物情屯田漸蕪府檄召民墾荒給帖爲業已墾者軍復  
爭之前令何應彪盛陳刁軍害民虔撫李汝華深然之未  
久復爭郡守金汝嘉頗庇軍鍾有條陳源委言多切中汝  
嘉不能奪葺誤邑志手自編纂迄今文獻不墜者鍾有之  
力也 同上

陳履忠字公亮號鳳阿昆明人崇禎進士知贛縣有幹濟才  
建社倉以備荒廉泉之側舊爲養濟院履忠勅爲書院以  
興文教肇舉廉泉大社鼎革後臺榭傾圮獨書院不廢 府志

王六如字凡夫黃岡人崇禎甲戌以舉人知信豐時寇盜蜂  
起兵役數發例舉縣中富戶當之輕重責成一人輪役經  
年無不破產者六如請於上官照糧編派黥者不得規避

倉庫本吏胥所司反外僉里民六如釐正之經費取足糧  
戶典守仍歸本役樹碑儀門永以爲式邑人祠祀之 同上  
國朝

郎永清號定菴廣陵人以大臣子弟選就國學順治癸巳由  
渾源知州擢知贛州府贛自丙戌城破加以閩廣連歲用  
兵民相率徙避永清勤招徠嚴約束復業者日衆時李定  
國犯梧桂郝尚九在潮官兵進勦以馬匹休飼於贛永清  
慮兵入城百姓騷動預區南門教場地爲營柵廠芻糧畢  
備而自往萬安迎哈朱二大將軍陳說宇內新定民爲邦  
本之義將軍至見供億整飭則大喜下令不許一兵入城  
瑞金石城寇掠最劇之地爲難民營構室廬收瘞齒骸興  
瑞定三邑游饑發大濟倉粟往賑全活無算贛諸生王曰

旦爲盜所引酷刑誣服永清廉其枉出之又雪與國民廖安民之獄在官四年兄子廷佐巡撫江西例宜引避贛士民伏虔臺乞留候代又一年丙申乃行贛人懷其德爲祠祀之

府志

蘇峻大順天人以貢生任贛州推官順治戊子諸邑猶未靖雩都渠帥曾斌羅聚奎等嘯聚禾豐山謀以二月窺城劉虔撫武元發兵勦之偵者道聞城中士民與賊通統兵諸將議先屠城而後擊賊峻大適以他事過雩雩民焚香城上自愬其無辜呼籲之聲聞十里外峻大兼程抵郡白其事力保雩民不反武元然之遣飛騎諭諸將毋妄殺良民持二金卮爲信乃嘗讌會文武衆所識者也遂撤兵獨勦禾豐先是屠城之令以某夜夜分砲三發爲約城中人皆

擊豕祀先聚食醉飽以待僂礮已二發哭聲殷地飛騎至得全皆慶更生爲祠以祀蘇公

雩都志

吉永迪字太丘陝西人進士順治庚寅知信豐時議勦安遠砂含賊練鄉兵於新田賊聞令離縣百餘里謀從他道乘虛劫城永迪偵知之乃夜伏兵於龍頭逕賊至大敗之壬辰九月復奉檄勦黃石砦副將楊栗賈三滌久戰無功永迪書諭以威德賊聽命永迪趨勇絕人嫻兵畧數以討賊自効所至有功

信豐志

趙夢仁字卜生河南人順治辛卯以進士知興國邑中兵燹之後絃誦不聞夢仁振興文教諸生匿不赴試召之庭與之講論文藝由是士知嚮學田畝荒蕪募民墾闢瘡痍漸有起色不二載以憂去

潞水志林

西江志 卷六十五  
蔡國相仁和人順治八年任定南典史九年十月十五日廣賊數萬夜衝定邑國相領鄉勇力戰殺賊數十眾寡不敵為賊所擒尚徒手搏賊而死 府志

郭堯京字平野高陵人順治十年由鄉舉知石城殘燬之後刻意興釐葺學宮繕城堞造警舖先是大盜陳其綸與東關盜黃允會踞砦未散鄰界羅漢巖劇寇沿鄉肆劫堯京募鄉勇伏險堵截其綸授首餘賊潛遁其俘掠難民悉獲放還民賴以安在任八年陞祁州知州 同上

黃里字君畝湖廣人辛卯貢士順治十二年知贛縣見荒缺十之七繪圖泣請題免荒糧一萬三千缺丁八千七百留給贛鎮兵米抵作贛漕至今兵民食其德 同上

沈元箕字子弓吳縣人順治十二年由恩貢知長寧縣先是閩人朱家垣託歸順安插邑中結土豪分立十營間井有事必關白而後行視令尹若贅旒為害者十年元箕至以情形具告虔撫蘇弘祖弘祖乃以諸營為之首者畀以材官等銜分隸他處資汛防漸次解散所奪民產盡給主者大害以除 同上

李佑之字在公長山人順治十四年以選貢知零都粵賊范日星嘯聚東鄉即用所撫之眾擒之己亥秋海寇蠢動江左李玉廷復叛督府遣將攻圍賊壘祐之親歷行間密捕間諜於是賊之驍將張寧閻勝等先後投誠玉廷宵遁獲之於九山田舍 同上

王枚字卜子鄞縣人戊戌進士康熙壬寅令贛時漸承平流遺復業荒蕪稍稍成熟有議陞科者枚喟然曰藏富於民

古之道也吾不能為惺軼之利國遂不上聞振興文學詩賦清麗越俗尤工書嘗縷竹絲為筆以書蒼鬱盤硬號四

明書格

同上

孔興訓字覺所山東曲阜至聖裔康熙甲辰守贛刻厲振作懲姦剔蠹胥徒畏之若神歲己酉安插閩海降兵屯田於贛諸屬與國屯兵洶洶欲為亂興訓親往履膝畝尺寸審度俾兵民各有其土居官九年民至今思之

同上

井厥字素菴北直文安人由進士康熙七年知長寧莅治精察能任繁劇時董總制衛國檄各縣解運豫備倉穀往省協濟厥詳陳搬運利害免解費一千八百餘兩康熙壬子閩寇入境厥調選鄉勇委典史鄭之鵬會勦大敗賊於牛

門山

長寧志

張激字潛有黃梅人順治甲午副榜康熙戊申知雩都政務簡靜甲寅閩變起其部因屯墾居興國者響應助亂據厓石山山接雩之北郊鈔劫長樂里天華山乙卯擁眾叩城下激閉城靜以待之城中無兵賊遙見城上旗幟干櫓隱映森列信宿退去一時稱神助莅事十有四年陞雲南雲

龍州知州

府志

宋必達字其在黃岡人順治辛丑進士康熙乙酉令寧都清泰懷德二鄉久罹寇燹多流移必達請盡蠲逋賦以徠之漸次開墾甲寅滇逆部將韓大任兵犯吉安虔屬震恐乃倣王文成保甲法簡習義勇團練約束汀州賊奄至縣境必達揮義勇橫擊之賊大奔解圍去

韓莢有懷堂集

李德明字瑞毓巴陵人任贛照磨康熙甲寅六月石城陷於

西江志 卷六十五  
閩賊總兵劉進寶帥師復之德明押紅夸大礮佐軍前令以陷城去撫軍委攝篆事石城近汀而遠贛汀久爲耿逆有德明豫爲保障計增築城堞城中無井汲於江每被圍軍渴乃堰江水入城浚池以蓄之又週城鑿隍僞將軍陳益擁衆來攻氣欲吞城德明揮兵一戰馘之邑人始無攜志丙辰二月滇逆高某陷吉安羣賊聲勢日熾僞將軍劉應麟以書誘降不聽囚其使應麟怒帥兵三萬圍城時外援不至德明與民死守鄉勇名畢佛者中礮碎腦語其伍曰公矢忠報國吾受公厚恩死無恨若等謹守堞毋爲賊乘言訖而絕德明哭而殮之衆皆感激奮呼請効死德明知人心可用乃出戰五戰五捷自是汀寇不敢復睨石城矣德明視事三載禱雨輒應人稱曰李霖其受代行也生

祠祀之 府志

郭毓秀字鍾山陝西人舉人知贛縣事時康熙甲寅耿孫叛於閩粵大兵出入多道贛有蜚語謂玉田村民通逆主兵者謀殲之毓秀言於佟撫國禎哲鎮爾肯曰

國初兵寇交訐贛四境蕭索獨田村鷺谿一二井里能自保聚遂以蕃庶遽以大逆誣之恐非惠養元元意也國禎爾肯皆然之毓秀即馳入田村令毀其壘培而供輸芻糗倍於他所議得寢越三年以慙樸忤上官去里人至今述其事猶有墮淚者 同上

王維威富平人任石城典史康熙甲寅石城被閩逆攻圍維威視事甫三日與照磨李德明協志守禦晝夜登陴二旬乃解丙辰劉應麟以盛兵至維威與戰破之嘗巡城矢集

臂弗為動三載寇禍卒保危城勞勩著焉

石城續志

錢志泗山陰人興國典史甲寅之變屯弁石昭最先發六月  
虔撫遣兵勦之昭與朱明拒戰於陳屋園志泗饋餉行至  
江背峒寇猝至襲其後遂被戕是冬郡丞顧岱來諭降始  
歸志泗首事聞廕一子經歷

激水志林

劉治國順天良鄉人康熙甲寅由蔭生知信豐丙辰六月賊  
王割耳李善長率眾萬餘攻城治國將家子有膽略增修  
城濠督兵守禦被圍數月贛兵救至賊乃退

信豐志

萬蹶生字文若江南武進人由副榜康熙甲寅令寧都初下  
車減徵稅耗羨一粟一薪之費不以取諸民三逆變起吉  
汀之間皆賊黨所潛伏俗故好亂蹶生踵前令宋必達鄉  
勇之制部署民兵而訓練之丁巳韓大任竄入縣境蹶生

多方禦之遂不犯城既而郡兵與省會兵皆大集蹶生支  
應有方民得不病越明年以事黜既解組猶居寧累年無  
以自食士民羣資給之

魏禧文集

黃惟桂字木菴直隸真定人以舉人知興國康熙丙辰至江


西韓大任寇據吉安邑中罹寇已四載惟桂招懷攜貳大  
任戰敗竄入寧都萬安瑞金間皆假道興境惟桂率民兵  
登陴戒嚴賊去則官兵之躡賊者至牲醴犒賚得其懽心  
乃上勦撫機宜先撫寶石次撫浪川又次撫鯉婆諸寨皆  
降獨厓石寨朱明狡惡負固乃陳狀於宣義將軍尚之義  
重兵困之四閱月始自縛下山撫局乃成值山水暴漲齧  
城繼以旱災發倉賑饑祈霖禱疫備嘗艱瘁甲子春陞貴  
州永寧知州

激水志林



西江志卷第六十五

Table with 12 columns and 10 rows of text.

程